

東

華

續

錄

臣朱壽朋敬編

臣潘鴻鼎恭校

夏四月丁卯朔時享 太廟道薄熙恭代行禮○志和練事解任以崇實兼署盛京戶部侍郎兼管奉天

府府尹○己巳以穆圖善警止白旗漢軍都統○庚午諭軍機大臣等崇實奏邊匪盤踞請調馬步練軍

及時勦撫一摺著李鴻章卽於直隸調撥步軍洋槍隊一千名馬隊五百名山海道星速前往並著選派

得力巡哨大輪船二隻駛赴大東溝後各海口以資策應○辛未 上詣 觀德殿 穆宗毅皇帝几筵

前行禮○壬申 上詣 觀德殿 穆宗毅皇帝几筵前行禮○癸酉京師旱筭奕際詣 大高殿恭代

拈香○欽奉 慈安端裕康慶皇太后 慈禧端佑康頤皇太后懿旨 惠陵現在擇吉興工除廊路及石

像生無庸修建外其餘均照 定陵規制前經降旨著派醇親王奕譞魁齡榮祿翁同龢承修所有一切

事宜著派恭親王奕訢總司稽查○甲戌諭宜振奏遵查專案工程請派員承修一摺所有 孝東陵

降恩門工程著派本年承修另案工程之大臣黃偉紹祺一併敬謹承修○以勸平四川峨邊屬滋事游

勇功獎叙提督李有恆等有差○乙亥諭軍機大臣等景廉奏請飭整頓臺站等語各路車報並餉銀軍

火關係戎機遲遲不容遲緩著額勒和布多布沁扎木楚杜嘎爾托倫布保英慶春奎昌設法整頓蒙古
臺站並嚴飭各臺遇有軍營摺報以及餉銀軍火務當迅速送辦毋得仍前玩泄致有貽誤將此旨諭令
知之○丙子常壽大祀 天於 閩丘遣載敬恭代行禮○廣東恩平開平二縣匪徒滋事勦平之獎叙
道員何應祺等有差○張兆棟奏准刑部咨議復御史鄧慶麟奏軍務肅清省分拿獲盜匪請照舊例辦
理一摺各省軍務雖早肅清盜劫之風尙未止息若連一律改歸舊制竊恐盜賊難行且各省情形不同
亦難懸擬行令各督撫體察情形迅速具奏再由部臣彙核辦理等因奉 旨依議欽此咨行前來仰見
聖主於矜恤民命之中仍寓慎重地方之意莫名欽服伏查粵東盜風甲於他省勦緝明火持械肆行
劫掠奸徒販賣人口出洋之案亦復層見迭出兇悍狡誦貽害閭閻一經拿獲必須立予駢誅方足以昭
炯戒先於同治二年經前督臣毛鴻賓前督撫臣郭嵩焘奏請將廣州府屬逆匪盜犯仍行解省勘審其
距省較遠之各屬州縣拿獲罪應斬處斬決各犯解交該管道府擬訊明確稟由督撫臣核明批飭就地
正法嗣因奸徒誘拐並非情甘出口民人販賣出洋情節可惡又經前督臣瑞麟前撫臣蔣益澧於同治
五年奏請於審明後分別首從擬以斬決絞決卽行正法先後欽奉 諭旨允准數年以來督飭各文武
實力搜捕獲犯多名均經照章就各州縣之距省遠近或解司審轉或解該管道府擬勘稟由督撫核明

定案因時嚴懲仍未敢稍涉草率現在外洋停止招工拐匪稍知斂跡自可變通辦理惟盜劫之風尙未止息且各省軍務肅清散勇陸續回粵實繁有徒鈐束巡防宜加嚴密遇有要犯拿獲仍當就地正典刑俾頑民觸目驚心咸知畏法若拘泥成例遽請規復舊制誠恐兇暴稽誅妄思漏網監獄擁擠致有他虞轉貽地方隱患臣與司道體察情形盜犯就地正法章程仍難遽復舊制相應請旨准將粵東拿獲逆匪盜犯除廣州府屬仍行解省勘辦外其餘省較遠之各屬州縣仍照奏定章程於訊明後錄供府交該管道府覆訊明確稟由督撫核明批飭就地正法一俟盜風斂戢再行請復舊制庶於地方捕務有裨至誘拐出洋之案近漸稀少擬請毋庸先行正法仍循定例由司覆訊解勘具題俟部覆到日再行辦理下刑部知之○丁丑命奕洲開去差使仍賞食全俸○緬甸來貢其表文曰緬甸國王小臣孟頓恭奏

天朝 大皇帝陛下伏以 聖人御宇川嶽悉被夫 懷柔薄海同風葵靈亦深其向慕小臣世居緬甸服屬遐荒自仰蒙 天朝恩准內附以來隸 禹甸則例修職貢載 堯天而願切嵩呼前戒烽火於邊陲久阻梯航於遠道今幸兵戈永息海宇乂安小臣屬在藩封亟應納貢謹備金葉表文一道長壽聖佛一尊馴象五隻及土產各物特遺頭目直也默紀們暗們甸沮素等代躬恭進 闕廷伏乞 大皇帝賞收 鑒茲恭順之忱俾遂瞻依之願小臣臨表不勝感激懼忭之至謹奏伏願 大皇帝萬歲萬萬歲

正貢使直也。默紀們册們何沮素副貢使繙也。他沮素副貢使繙也。他覺工計金葉表文一道。繙石長壽
聖佛一尊。馴象五隻。象牙一對。重九十斤。玉石三件。共計二百一十斤。帖金鑲鏡大盆子八個。紅寶石金
手籠二道。鴉青金手籠二道。黃紅綠小呢共八板。厚洋布十件。洋紗十件。花手巾十件。細手巾十件。洋氈
二十床。金箔臺四張。銀箔臺四張。檀香八斤。紅檀香九斤。降香。樹桂水十瓶。梅桂油十瓶。四號盆子四個。
五號盆子五十個。畫象九帖。孔雀尾十五。柳車機大臣奉旨覽。○戊寅諭前因崇實等奏查明盛京戶
部侍郎兼管奉天府府尹志和奉天府府尹恭鐸委署地無定章。恭鐸並任令劣藉黃縣監盤踞招搖。當
降旨將志和恭鐸交部議處。茲據吏部遵議覆奏。志和恭鐸均著照部議降三級調用。不准抵銷。恭鐸並
照部議即行革職。○崇實奏奉省各屬州縣共十八缺。除補署各員已經到任。外在省候補並無一人。現
任中郎有應撤應參而交代之員。竟至束手無策。以應請旨飭下吏部將曾任實缺州縣及正途出身
者不拘滿漢揀發七八員。呈遞前來。以資委用。惟查向來請據各員往往延滯經年。尚未到現。在奉省
需人孔急。合再仰懇天恩。飭下吏部趕緊舉辦。所有揀得人員。限兩個月內。即須到省。庶不至貽誤地
方。得旨。允行。又奏吏治之壞。固在地方。各官而奉省。旗界各官。稍習尤甚。前任將軍都興阿。實因老病
難支。以致將軍衙門一切公務。皆為各協領。從中把持。遂至旗營陋習。固結不解。若更張太急。又恐枝節

橫生然一味因循吏屬不成事體奴才崇實惟有相機審度漸與轉移若事事拘定苟章必至轉多掣肘
現在駐紮客兵惟吉林馬隊二百餘名黑龍江馬隊七百餘名分防各隘均極整肅此外直字營勇丁歸
總兵張得祿統帶亦頗勤奮奴才業已加意拊循而統帶黑龍江官兵之副都統色楞額尤為得力都興
阿因係胞姓未肯令統全營翼長奴才查色楞額打仗勇往實堪委任惟謀略尚非所長茲查奏調直隸
候補知府陳本植熟習戎機放於任事以上文武二員可以相資為用現擬派色楞額陳本植均充客兵
全營翼長似於軍務方有裨益報聞○己卯丁寶楨奏上候補同知直隸州知州薛福成應請陳百疏臣
伏讀邸鈔欽奉 慈安端裕康慶皇太后 慈禧端佑康頤皇太后懿旨諭令內外大小臣工竭誠抒悃
共濟時艱仰見 聖朝博采讜言之至意臣謹擬治平六策曰養賢才肅吏治恤民隱籌備運練軍實裕
財用均期有裨實務稍濟時艱如蒙 聖明俯賜察駁天下幸甚世運之所以為隆替者何在乎在賢才
之消長而已夫天之生才恆足以周天下之用然而賢才有盛有不盛者則培養之道為之也曩者 大
行皇帝御極之初 皇太后殷殷求治博訪賢才大臣薦舉每多不次擢用於是有碩輔益 朝勳臣輩出
四方瓊俊奮袂崛起以贊 中興之運是豈無術以致之哉蓋由 虛懷宏獎振古罕有而不拘一格
隨宜器使用能光顯丕業至今猶被其蔭邇年以來獎進之賢才似稍不如前矣竊恐數十年後老成凋

謝繼起無人此事之大可慮者也夫欲賢才之奮興必先培養於平日培養之術其要有三一曰重京秩自古設官重內輕外漢汲黯出守淮陽則至於流涕唐班景倩入爲大理則喜若登仙此古帝王居中馭外鼓舞豪俊之微權也我朝頒祿因明舊制京員俸薄不逮漢唐十分之一又自耗羨歸公之後外官有養廉而京員無養廉人情益重外輕內然其初升轉猶勿京外兩途互爲出入故供職者不以爲苦近日京員盼幕外放極不易得恆以困於資斧告假而去絕跡京華其留者衣食不贖竭蹶經營每於國家之憂故民生之利病不暇講求此京秩所以愈輕也查乾隆二年增京官恩俸法良意美度越元明似宜略仿前謨酌爲推廣別籌恆款普加京員養廉籌款之法宜取諸節省之餉項方今開關隴次第肅清夷營大半凱撤將來所節餉幣合計不下一千餘萬應查各省停播之餉酌提十分之一二飭令每歲解部以備京員養廉之用所費於國計者甚微所裨於治體者實大至若清要之選當謀以經世之具勿專尙小楷之精試律之巧俾講求實用其各部院保舉人員在聖明鑒衡不爽隨宜超擢以勵其氣中外迭用以練其才庶舉世重外輕內之見可以默轉於無形百年樹人之計在此舉矣一曰設幕職伏查雍正元年世宗憲皇帝命督撫保舉賢實以彰激勵諭旨有云今之幕客皆徵辟落僚功績果著卽拜表薦引彼愛惜功名自不敢任意苟且臣謹按我朝名臣若方觀承嚴如煜林則徐近年如

大學士李鴻章左宗棠始皆託跡幕僚洞悉中外利病故能卓著忠勳可否略仿漢唐宋遺法仰承世宗鼓勵人才之盛心准令各督撫奏辟幕僚自京外官以至布衣如有才守出羣者許卽專疏保薦視其本職計資論俸一體升轉無職者量加錢用行之稍久必有闕駿之士出乎其間此亦造就之一法也一日開特科隋唐以降始專尚考試然其時科目甚多登進之途頗廣明初始專以八股取士文風渾樸得人稱盛今行之已五百餘年陳文委積勸說相仍而真意漸泯取士者束以程式工拙不其相違而黜陟益以難憑遂使世之慕速化者置經史實學於不問而取近科間墨摹擬剽竊以弋科第前歲中式舉人徐景春至不知公羊傳爲何書貽笑海內乃其明瞭然則科舉之法久而漸敝殆不可無以救之矣我朝康熙乾隆年間兩舉詞科一時名儒碩德及國雅備異之才悉萃其中文運之隆遠邁前古非賢才之獨盛於此時也誠以大臣之舉非開筮素著者不敢妄登薦牒其與冥搜於場屋決得失於片時者迥不侔也誠法 聖祖 高宗邁意特舉 制科則非常之士固風興起其設科之名或稱博學鴻詞或稱賢良方正或稱直貢極諫應由部臣臨時請 旨定奪庶賢才無沈抑之患可輔科舉所不逮而前此空疏之弊亦且漸以轉移或謂方今科甲人員不少而復舉特科恐益致仕途之壅滯不知特科乃曠世而一開所用不過數十人且其所舉大半亦出於科甲是未足爲科甲之累而適所以濟科甲之窮補偏救敝

之方不外是矣蓋重京秩則賢才奮於內矣設專職則賢才練於外矣開特科則舉世賢才無遺逸之虞矣臣之所願養賢才者此也自來吏治之升降視乎牧令之賢否牧令之黜陟由乎大吏之考察大吏果賢則吏治不愚其不勸也伏讀 皇太后懿旨諭令各直省督撫秉公舉劾任用賢能煌煌 聖訓整飭

吏治之委規不外是矣臣愚以為方今激勸牧令又有兩端一在清其途一在勵其氣何謂清牧令之途國朝捐輸之例向因不得已而設我 宣宗 文宗御極之初首停捐例當時以為美談嗣因髮捻

蹂躪浩繁始議推廣捐例然收數未見贏餘仕途益形龐雜 臣常考乾隆年間常例計每歲捐監捐封捐雜職等項收銀約三百萬兩今捐例既從折減以示招徠而每歲戶部收銀轉不及百五十萬是何也名器重則虛銜懶覺其榮雖多費而有所不惜名器濫則實職不難驟獲雖減數而未必樂輸人情大抵然也自頃軍務告竣銅需大減如謂 國家闕此百數十萬之經費 臣有以知其不然矣况今甘肅捐

監捐等局所得無幾所傷實多該省既已肅清尤宜亟行停止今欲讓停捐例宜於各省鹽課洋稅項下均勻指撥合成鉅款以抵京銅局之所入其捐輸常例但留捐監捐封捐級與捐雜職等項概收實銀人知名器之足貴則戶部收數亦必不至於過絀 國計無纖毫之損吏治有澄清之益轉移之機非細故矣何謂勸牧令之氣東漢縣令往往入為三公唐世凡官不厭州縣不擬臺省宋制非兩任州縣不得

除監察御史自明以後行取知縣皆入爲御史及主事得人最多我朝康熙年間名臣如郭琇彭鵬陸

隴其朱軾皆由縣令入爲京員理學經濟定耀一時康熙四十四年御史黃秉中疏言知縣考選科道殊

覺太驟 廷議停止乾隆初年又以主事人多缺少凡行取知縣改以知州揀選在當日酌吏成法原所

以協一時之宜然行之百年州縣無望於清華漸乏循良之績京員未膺夫繁劇或少練達之能吏治與

人材不免兩爲減色今欲整飭吏治陶鑄人材莫如復 聖祖初年行取舊制或稍變通其意州縣兩途

並予行取凡科甲出身保舉卓異之員知州行取授御史知縣行取授主事庶銜缺亦足相當而上司操

此爲激揚牧令該此爲清賞吏治必有振興之一日或謂近日京員壅滯而復參用外員恐愈失疏通之

意不知康熙以前京員練習民事上而督撫下而道府莫不起自京員方今 聖朝知人善任若果廉厲

京員俾與外員互爲出入正所以疏通京員也京外兩途無扞格不通之慮而後到治可期矣夫既清其

途復勵其氣然後廣大吏以考課雖中材之牧令將自奮於功名然尤有宜治其本者則養廉坐支各項

減成不可不復也查各省文職養廉向支錢糧耗羨同治八年部議廉俸復額必須各省錢糧耗羨徵收

足額始可抵放此亦本末兼權之意惟是州縣養廉大者無過千兩蓋與坐支各款均屬辦公不可少之

費今皆減成撥給其公私之用必至竭蹶欲其不妄取於民不可得也州縣無清廉之操欲其課農桑勸

撫字善僅科不可得也且錢糧之不足額半由民欠半由官虧與其靳數成之費歛而虧無限之公帑似不如全復舊額而嚴數官虧可以最官常卽可以裕國計取吏之本莫先乎是若夫勸懲之具表率之實是在大吏平時之措注非一朝一夕之故也臣之所願肅吏治者此也天下當有事之時軍餉之不能不藉資於民力者勢也曷以勸辦粵捻各寇不得已而設局抽釐酌取商賈之贏餘略濟餉需之支絀以視元明之加賦籌餉相去不啻霄壤加以我國家二百餘年深仁厚澤挾髓流肌商民踴躍輸將源源接濟故能饋數十萬噉噉待食之軍而城方張之寇惟其如是而民情大可見矣然民力必休養於平日始可借資於一時今海內軍事已平臣愚以為聖朝軫念民瘼此其時也軍興以來盤金之旺寮推東南數省今試以江蘇一省論之江蘇久遭兵燹瘡痍呻吟元氣未復向已力籌鉅餉聊平諸寇今則戶部指撥之款各省歲協之餉悉以江蘇爲大宗計其所出地丁居其一漕糧居其一洋稅居其一鹽課居其一盤金又居其一每項各數百萬輒員不廢於他省而財賦倍蓰過之民力之竭亦可知矣以臣所見闕十室九空而百物昂貴小民奔走指撥艱於生計力田之農終歲勤劬尙難自給偶遇水旱卽不免流移道路其顛沛饑餓之况不可殫述也一省如此他省可知伏惟聖慈惻隱在抱似宜乘此運寇蕩平之際與民休息漸蒸盤金卽以一時經費未充尙難驟撤可否飭下各省將撫察度情形酌減捐數

或歸併釐卡以爲異日盡裁之漸至於布帛粟米爲羣黎衣食所資尤宜普除慈捐大慰民望若再因循不革恐承平無事上下視爲定額必將有不可少之出款與爲抵銷一旦復有不虞之事將籌何款以應之故裁之所以爲異日緩急計也若夫釐金之外又有厲民之政則莫如四川津貼一項四川古稱饒沃國初定賦以其莽經寇亂概從輕額故其地五倍江蘇而錢糧不過五分之一厥後生殖日繁物阜民富仕宦之人遂視四川爲財藪其公私雜費與一切陋規莫不按畝加派名曰津貼遷流日久變本加厲取之無藝用之愈奢凡州縣供應上司之差小者千金大者逾萬綜計民力所出逾於正賦之額幾有十倍不止者夫 聖主有輕徭薄賦之仁而小民轉受苛派無窮之累揆厥由來雖非一日而循是不變終爲厲階茲欲剔除宿弊誠宜大加整頓酌時宜明定經制 飭下疆臣風勵僚屬敦尚廉隅庶積習可調而於 國計民生兩有裨矣臣之所願恤民隱者此也自元明漕東南之粟以實京師累代講求其法屢變元用海運惠多漂漕明用河運惠多勞費二者得失維均今則海道便利事捷而費省運河梗阻法敝而費多竊嘗綜其利弊論之蓋河運不如海運海運不如商運臣請略陳其說自前明以屯田養衛軍以衛丁運漕糧 國朝改爲旗丁其始法非不善暨其弊也屯戶不能耕而備平民以耕旗丁不能運而募水手以運於是積耗多而遊手繁旗丁誅求於州縣州縣暴斂於平民其取盈於旗丁者則有間官有

弁兵有倉書其取盈於州縣者則有上官有榮紳有胥吏上下交征而州縣之取諸民者往往三四倍於正賦其費之於上者則有漕艘之修有旗丁之糧有州縣之支銷有糧道之經費加以關官衛官之俸漕標河標之餉滿查嘉慶年間協辦大學士劉權之疏言南漕每石需費十有八金蓋合上下浮費而言之

國家歲漕四百萬石之米是有七千餘萬金之費也近歲海運之法行蓋窮極變通之候在 國家減省浮費裨益實多其州縣之漕章亦經各省大吏酌中釐定明予以辦公之經費雖絕其無限之浮收民情翕然至今稱便乃聞議者頗欲規復河運苟非狃於故見則必有所利於其中者也啟申飽而便私關孰甚於是河運之不如海運明矣 又聞京倉支用以甲米為大宗八旗兵丁不慣米食往往山牛菜章京領米易錢折給兵丁買雜糧充食每石京錢若干合銀一兩有奇相沿既久習而安之官俸亦然領米輒發米舖或因糶雜泥沙霉爛不堪復食則發糖坊每石得銀一兩有奇赴倉親領米者百不得一蓋涉途遠則侵蝕必多經時久則折耗自易以漕運無窮之勞費而每石僅獲一金之用亦可慨矣今誠統計南漕抵倉之米每歲共有若干 飭令各省將折漕之價與應發水腳之費解交部庫所有甲米官俸願領銀者照漕折銀數發給每歲部發銀幣慎選廉幹之員於天津通州京倉三處招商運米宜於免關稅外撥糧船帶免他稅之例定為運米若干石准免他稅若干回空之船一體給照免稅倉米既滿而運

米糶於市者亦如之商人惟利是爲一聞定例則江浙之米與奉天牛莊之米必將航海而來山東河南之米亦由運河而至京東鹽潤玉田之米絡繹駢集惟所擇之如此則有七便焉米色精潔一便也部庫充裕二便也民力久紓三便也內外支銷漕項節省至千萬兩以外四便也甲米官俸所得有豐於前五便也都門內外米商奔赴自黃流通六便也畿民見米之易得多種稻田漸興水利七便也有此七便上下交益是海運之不如商運明矣或謂滄海茫茫恐一旦有不測之變招商亦難經久終不如河運之可恃不知商運道以備不虞可也慮滄海之有警因謂海運不如河運此因噎廢食之見也況今洋而平穩輪船迅速雖在多事之秋富商大賈挾數百萬之資致數萬里之遠踰山涉波艱難險阻曾不假尺寸之勢什伍之術不慮不達而運河數千里節節設阻一有烽塵之警亦未必暢然可行爲今之計宜以海運與招商並舉如招商蓋有成效不妨漸推漸廣而略以海運輔之仍隨時保護運河量加修濬每歲酌行河運十數萬石務使運道毋廢而已若是而謂運道有壅闕之虞京倉有闕乏之患必不然矣臣之所願籌漕運者此也自古養兵無善政南宋之括財晚明之加賦皆爲兵多所累誠者病之我朝綠營兵額五十餘萬較之宋明業已減半然養兵之費歲二千萬幾耗天下歲入之半軍興二十餘年各省勦賊皆倚勇丁以集事曾未聞綠營出一良將立一奇功臣蓋嘗深究本末而知其弊也查各省綠營補制馬兵

月餉銀二兩步兵月餉銀一兩五錢守兵一兩平時仰事俯畜尚雖自給咸以小翼營生手藝餬口承平
日久或沒齒不經戰陣其居將領之任者亦復狃於因循拘於文法於是乎有老弱濫竽之籍有役使趨
走之卒有侵減虛懸之餉其兵仰食縣官視爲當然悍者飲博無賴愚者疲玩不振每遇操演之期巧飾
虛藝以炫耳目一聞徵調膽寒氣沮甚者僱人頂替行則需軍役則需夫繁索供張官民交病泊乎臨敵
眞能折衝致果者百無一二積弊相嬲雖有豪傑之士無由奮興然則綠營之不可復恃者時勢然也自
楚軍淮軍相繼並起勇丁月餉倍於綠營之戰兵其得力尤在法令簡嚴事權專一自統領以至營官什
長莫不情意相洽詎若一家而又可撤可募隨募隨練用其方新之氣故能奮建殊勳然今之勇營已稍
不如前矣若使積年屯駐不見大敵久而暮氣乘之又久而積習錮之恐復如綠營之不振故中外之議
皆主撤勇而練兵夫練兵誠急務也然使僅守綠營舊制是兵愈冗而愈弱也臣愚以爲居今日而修戎
備與其以一餉養一兵而十兵無一兵之用何如以兩餉養一兵而一兵獲數兵之用昔人謂兵貴精不
貴多其成效可觀也臣謹案乾隆四十七年增兵六萬有奇大學士阿桂上疏力爭以歲餉驟加恐難爲
繼厥後果因帑藏大絀疊議裁汰頃者海內用兵未遑兼顧綠營兵餉欠發甚鉅自是每有戰守之事一
倚勇營而綠營幾同虛設近見各省整理綠營如浙江之減兵加餉直隸河南之添餉練兵前大學士曾

國藩在兩江總督任內整頓外海水師將兵一萬餘名裁爲二千餘名以濟添給薪糧修造船隻之費部
議題之蓋中外大臣皆已深鑒綠營之敝而思有以救之非一日矣可否推行此法 飭下各省督撫裁
汰綠營虛額與其衰廢斥退之缺病故開之缺一概勿補仍察各路情形或存綠營原額之半或減存
三分之一以其所節之餉酌加馬步口糧分隸數鎮會合訓練營制太破者歸而併之汛防太散者撤而聚
之約計腹省有勁兵一萬邊省萬五千人卽可以彈壓盜賊隱備不虞仍酌留得力勇營參錯屯駐有事
則輔以召募精戰守之實務行訓練之成法如是則平時無冗食之兵臨時獲勤旅之用循名覈實化弱
爲強計無過於此矣雖然方今要務整理綠營之外尤有培護根本之計有慎禦門戶之計所爲根本之
計何也我 國家神武開基東三省勁騎爲互古所僅見近以微調絡繹漸至凋零老耆物故弱者未壯
其於布陣合圍之法馳驅擊刺之術漸失其傳若不及時整飭恐斯事遂爲絕學似宜 飭下吉林黑龍
江將軍挑選駐防子弟優加廩餼而勤練之務使制勝妙技屢續不窮將來遠旅日出北可固邊塞之防
西可備新疆之用所裨豈淺鮮哉所謂門戶之計何也東南軍事以水師爲最利長江水師利用削板長
龍快蟹等船外海水師利用廢艇紅單拖帶等船而論今日海疆所需則輪船尤爲利器然其操演之法
與長江水師截然不同途與外海水師亦迥然異轍苟非專門名家曷年畢世不能洞悉其精微今中國固

國各廠雖陸續製造輪船似尚乏統帶輪船之將才則利器不可得而用也夫事當締造之初非破格拔擢不足以彰激勵似應 飭下海疆大吏薦舉輪船將才其尤異者不次拔擢俾天下知功名之路相率研求殫精畢力以備干城之用庶幾將才益練水師益精而外侮無虞矣 臣之所願練軍實者此也孟子有言無政事則財用不足大學平天下一章於理財之道蓋兢兢焉 臣之愚策如所謂加養廉俸捐例裁撥金皆有妨於財用者也如所謂覈冗餉籌濟運減兵額皆有裨於財用者也以其所贏補其所絀原足相資而論方今不涸之源則尤賴 朝廷崇尚節儉以風天下天下盡趨於節儉而財用無不足之虞故 臣又以爲理財之政不必開其源也惟在節其流而已節流之法不必廣其術也惟在敷州縣之交盤而已謹查吏部定例州縣交代正限兩月內不能結者謂之初參展限兩月復不能結者謂之二參如舊任官虧缺正項錢糧或並無虧缺而新任官遲延不接者皆由該督撫題參革職交代未清而該上司不聲明者司道府州降三級調用督撫降一級留任此行之久而無弊者也降及晚近州縣交代不盡依限完結上司憚處分之繁亦遂不依限題參往往藉轉駁查寔延歲月及其授久積任困於旅費無款可交終身寄寓子孫流離皆所不免其新任以積款未清轉相牽掣於是交代不結者什有八九而上司亦隨有參不勝參之勢庫款之所以日虧職是故也 臣聞近來辦理交代以山東爲最督山東一省自前撫臣

關敬銘申明請例刊刻交代章程十一條頒發州縣並通飭各屬不得藉各項工程名目報銷正款錢糧其交代逾限者參革無貸同治初年每歲藩庫所收正雜各款不過八九十萬兩近則藩庫收款至二百五六十萬以外藉支本省餉需及京協各餉一省如此天下可知矣夫州縣職司錢糧坐擁倉庫計其公私之用每歲多耗數千金未甚覺其費也然合天下千五百州縣計之是三年而耗二千萬也彼曾任州縣者亦以挪移甚便不能節縮衣食終不免窘乏之虞查抄之累此公私兩損之道也若交代素嚴俾州縣儉知節儉則國家少虧帑之虞州縣免終身之累此公私兩便之道也如臣愚見可否 飭下戶部申明請例並咨取山東交代章程統行各省實力辦理又恐積虧之後驟加整頓則新舊相渾窒礙必多欲杜侵虧惟有寬既往而嚴將來之一法酌復養廉以裕其力禁止攤賠以清其流庶各省大吏易於措手自茲以往逾限必參二參必革功令嚴而虧挪少虧項絕而庫藏充理財之道莫先乎此矣臣之所願裕財用者此也又密奏自古邊塞之防所備不過一隅所患不過一國今則西人於數萬里重洋之外輒至中華聯翩而通商者不下數十國其輪船之捷火器之精爲自古所未有恃其詐力要挾多端連一言而取毀造生牽一髮而全身俱動智勇有時而並困剛柔有時而兩窮彼又設館京師分駐要口廣傳西教引誘愚民此固天地適然之氣運亦開闢以來之變局也臣愚以爲欲禦外侮先圖自強欲圖自強先

求自治臣所擬治平六策於中國自治之方既略陳其要矣茲復謹籌海防密議十條冀於自強之道稍裨萬一伏惟 聖明鑒其愚誠俯賜採擇為一擇交宜審也昔者樂毅伐齊必先聯趙諸萬守下首尚和吳蓋有所備必有所親其勢然也洋人之至我中國專恃合從連橫而我以孤立無助受其箝制含忍至今誠欲於無事之時多樹外援則擇交不可不慎也方今有約之國以英法俄美德五國為最強五國之中英人險譎法人慊悍所至之地便思窺伺蠶噬隱圖佔踞此中國之深仇不可忘也俄國地廣兵強為歐洲諸國所忌今且西守伊犁東割黑龍江以北據最勝之地以扼我後路是宜羅設大防以為藩籬而尤注意於東三省嚴為之備而婉與之和此中國之強敵不可忽也美國自為一洲風氣渾樸與中國最無嫌隙其紐約與補公使所立新約則明示以助我中國之意蓋亦恐中國稍弱則歐洲日強適為彼國之害也故中與美國宜推誠相與略棄小嫌此中國之強援不可失也德人新破法國日長災災幾與俄英鼎峙其通商之船尚少則交涉之事亦無多此亦中國他日之強敵不可恃為援亦未至驟為患也自昔列國爭雄之世得一國則數國必折而受盟失一國則諸國皆從而啟釁蓋擇交之道得則仇敵可為外援擇交之道不得則鄰援皆為仇敵誠宜豫籌布置雖為聯絡一旦有事則援助必多以戰則操可勝之權以和必獲便利之約矣一儲才宜豫也自中外交涉以來中國士大夫拘於成見往往高談氣節

鄙棄洋務而不屑道一臨事變如瞽者之無所適從其號為熟習洋務者則又惟通事之流與市井之雄聲色貨利之外不知其他此異才所以難得也今欲人才之奮起必使聰明才傑之士研求時務而後可昔漢武帝詔舉茂才異等可為將相及使絕國者似宜略仿此意另設一科 飭令內外大臣各舉所知亦不必設有定額其新科進士大挑舉人優拔兩貢如有洞達洋務者亦許大臣保薦仿學習河工之例別為錄用其用之之道如臆識兼優才辯鋒生者宜出使熟諳條約操守廉潔者宜稅務才諳練遠風骨峻整者宜海疆州縣求之既早斯用之不窮彼士大夫見聞習熟亦可轉移風氣不務空談功名之路開奇傑之才出矣一製器宜精也西人器數之學日新月異豈其智巧獨勝中國哉彼國以製器為要務有能獨創新法者即令世守其業世食其利由是人爭自奮往往有積數世之精能創一藝而成名者中國則不然凡百工技藝視為鄙事聰明之士不肯留意於其間此所以少專家也夫周官攷工一册自梓匠輪輿以逮瓦甌陶冶莫不設為專官子孫世守勿替他若奇肱氏之飛車公輸般之攻具諸葛亮之木牛流馬其精詣獨至之處何嘗不逮西人哉正以後世不崇斯學故浸失其傳耳今欲鼓舞人心似宜訪中國之巧匠給之虛銜以風勵之隨時派員帶赴外洋徧游各廠以窺其奧窔有能於洋人成法之外自出心裁者優給獎敘或仿西人之法俾獲世享其利庶巧工日出足與西國爭長矣一造船宜請也外

國輪船之制有商船有兵船商船以運貨爲主式略短而中寬兵船以戰陣爲主式較長而中狹至其附輪之高下食水之淺深皆自截然不同方今閩滬所造輪船不盡可作兵船者其初用意蓋欲取兩式而兼營之然其弊也運貨不速商船之多戰陣不若兵船之勁是欲求兩便而適以兩誤也竊謂自今以後各廠造船宜令訪上等兵船之式專精仿造如有商民願繳造價公設輪船者准其赴局專造商船如此分晰辦理庶中國之船漸推漸精而經費不至浪擲矣一商情宜恤也查西洋立法以兵船之力衛商船卽以商船之稅養兵船所以船數雖多而餉項無缺者職是故也往年中國議定章程設立輪船招商局奪洋人之所恃收中國之利權誠爲長策惟是推行未放華商之應募領船者尙屬無幾且自中外通商以來江浙閩廣諸商亦有置買輪船者大抵皆附西商之籍用西國之旗雖經費甚大利歸西人而諸商曾不以爲悔者其故何也蓋爲華商則報稅過關每遇稽滯掣肘必多爲洋商則任往各口無所攔阻獲利較易也今誠體恤商情曲加調護務使有利可獲官吏無詐需索關津不得稽留令明法簡將來繳價造船之商自必源源而來貿易既盛漸可駛往西洋諸埠雖分洋商之利然後權其常稅專養兵船務使巡緝各洋以爲保衛商船之用從此兵船益多而經費不絕富強之道基諸此矣一茶政宜理也中國出口之貨以絲茶爲大宗茶葉一項與洋人進口之鴉片其價值略足相當然鴉片之來爲害於中國甚深

茶葉之往爲利於西洋其大洋人以茶葉爲性命恃以消瘴辟除疾病不能一日稍離聞嘗詢諸茶商數
諸近日新聞紙統計每歲各路出口之茶價值約三千萬兩以外若惟其什二之稅是歲入六百萬也今
者海關稅則刊在條約不可復改而各省之茶捐茶稅收數未旺隱漏尙多夫欲籌禦外之規必先操裕
財之本欲勿累吾民而財足莫若仍取諸外洋昔管子謹正鹽筴而諸侯斂袂朝齊誠知利權所在足制
諸侯之命也方今中國大利被洋人網羅盡矣祇此物產之菁華可以默操其權宜於閩浙湖廣江西安
徽出茶諸省酌加稅額而嚴駁其隱漏茶稅則茶價亦昂顯取諸內地之民實贖收洋人之利惟其
經理之法宜出之以漸濟之以極務使洋人相安於不覺數年之後必有成效舉凡製器造船之費練兵
籌餉之源皆可取資於是矣一開礦宜籌也中國金銀煤鐵等礦未經開採者處處有之貨棄於地而外
人垂涎久矣似不妨用彼國開挖之器與中國永遠之利查有礦苗旺處由各省大吏諮訪民情察度地
勢果其毫無妨礙始許興辦其開採之法有二一曰官採由官酌撥款項僱洋人買機器隨宜辦理一曰
商採仿准鹽招商之法查有殷實華商准其集資報名領帖設廠置備機器自行採取官爲稽其廠務視
所得之多寡酌定稅章程嚴禁隱漏如是則地不愛寶民無棄財不失中國饒富之權不敢彼族覬覦
之漸是亦籌餉之一助也一水師宜練也外國兵船之制船主爲全船綱領其下有總領官主水陸攻戰

有領隊官主船中排隊有大夥二夥三夥專佐船主行船此外如管理機器看守汽表與夫裝送子藥糧
敵取準各有專司其收放帆篷登陟桅頂駕馭艙板抽水救火等事皆令水手操練職司有定位作息有
定時習之既專且久所以能縱橫無敵今中國輪船亦頗效西法參用洋人究未造其深際無他學習不
如因歷之精而所用洋人無上選也昔坐臣教吳武靈胡服始皆借才異國終則遠出其上唐太宗駕馭
蕃將多能得其死力竊謂沿海大吏與出使外洋之員皆宜留心物色如洋將中有挾高才而願遊中國
者不妨羅致一二人縻以厚祿善為駕馭先令教練一船久則推演漸廣仍仿俄國初年練兵之術選沿
海勤敏之子弟送入西船俾入各司而協貼其經費數年回國分配各船庶技藝日精水師日勤不難操
券而決矣一鐵甲船宜購也西洋守港之恃鐵甲船獨行軍之恃營壘尋常輪船當之輒碎又有鐵甲小
船所以纏繞敵寇四面伏擊最為靈活堅利惟食水過深不能遠越重洋是以至中國者頗屬寥寥今中
國既有輪船數十艘亦宜酌備鐵甲船外則巡緝洋面恃為游擊之師內則扼守要口勝於砲臺之用蓋
有一鐵甲船而諸輪船即可依護以增氣勢尤幸彼之不能來犯我即可恃為專長苟非未雨綢繆則倉
猝必唯籌措似未可以需費稍鉅而失此遠圖也蓋鐵甲小船不難由內地仿造其大者工程繁重驟難
得其要領非在外國定購不可又恐定購之後雖越重洋不妨將鐵料如式剪裁分拆運送飭匠釘配但

必讓價定造不可承買得船耳一條約諸君宜頒發州縣也西人風氣最重條約至於事關軍國尤當以萬國公法一書爲憑如有阻撓公事違例干請者地方官不妨據約駁斥果能堅執不移不特遇彼狡謀猶且從而教導之如或詭隨執法不特長彼驕氣彼且從而非笑之蓋西洋立國非信不行非約不濟其俗固如此也方今海疆州縣商船之絡繹傳教之紛繁事事與洋人交涉乃當其任者往往未見條約茫然不知所措剛柔兩失其宜其偏於剛者既以違約而滋事端其偏於柔者亦以忘約而失體統敢置召侮職此之由似宜將萬國公法通商條約等書多爲刊印由各省藩司頒發州縣將來流布漸廣庶有志之士與辦事之官裨世吏咸得隨時披覽一臨事變可以觸類旁通援引不窮矣疏入不報轉交軍機大臣發各衙門議奏○庚辰以慶裕爲奉天府尹○辛巳以京師久旱遣奕諒詣大高殿恭代拈香○諭左宗棠奏本年舉行鄉試請飭派正副考官一摺甘肅陝西兩省現在分闈考試路途較遠所有請派考官著禮部於陝西之前具題辦理○甲申丁寶楨奏伏查大壩合龍以後雖即拍填土櫃趕澗後山高出水面以期閉氣惟土櫃後戍正當邊城與正壩大溜跌塘之處水深至六七丈不等用土既費急難見功且壩壑仍須陸續加脩土櫃後戍卽須隨之增長臣當經調派文武各員妥速辦理以免稽延茲據稟報所有加脩壩土及一切善後事宜於四月初六日一律告竣並據河工收支局委員核明壩土各項各

用銀九十八萬七千九百五十四兩六錢九分八釐較上年原議抵工次確勘復估核減需銀一百二十萬兩之數計仍節省銀二十萬兩委係涓滴歸公並無絲毫浮冒至應築堤工前議南北兩岸約共五百餘里續經復估核減約需銀一百五六十萬兩嗣以堤工係在南岸且北岸地勢較高應先將南岸丈量明確俾上下遊同時施工計東省荷澤縣共一百九十里餘直隸東明縣計四十三里餘又東明續增李連莊迤上堤一十八里餘綜計直東兩境南堤工二百五十餘里東境地勢較低原定堤身底寬十丈頂寬三丈高一丈四尺均飭各州縣勸諭民間認段協修定以每里發給民夫津貼銀二千四百兩其中有坑塘溝槽並低窪積水處所應需格外填墊加用椿料之處隨時查看寬深丈尺另行酌加津貼直境地層上遊灘面稍高堤身定為底寬八丈頂寬二丈高一丈二尺每丈土方計酌減三分之一亦飭該縣勸諭民間協力興修每里計發津貼銀一千六百兩李連莊以上一十八里地勢尤高堤身丈尺亦稍減共計津貼銀一萬兩因直隸未能籌款所有東明堤工津貼銀兩經臣即在東省工需項下一體全數撥撥發交該縣以期趕辦現計直東兩境南岸堤工津貼共用銀五十餘萬兩因按段分工之處彼此各有畧畧又平地築堤所有跨壓河身及填壓溝槽積水各處甚多民力實不能逮亦應酌給津貼多寡不等現在尚難核定應俟驗收覆丈時再行定數裁明用款辦理茲就南堤工程已成者約有十之三四至四月

中旬可成十之六七四月底即可一律告成於防禦不致遲誤惟下遊踰壓支流前擬在菜園莊施工旋以引河日旺該處水勢漸深不易著手因改在盧莊踰壓沮河使黃水仍由十里鋪多一去路庶下遊較暢惟踰壓沮河丈尺寬至八九十丈需用物料填築爲費亦多亦經酌給津貼交地方官督飭妥辦至北岸堤工本應一併舉辦祇以前次水勢漫灘擬立北堤基址尙多有水嗣約計時日已迫誠恐趕辦不及於止月中奏報鳩工情形曾聲明若此堤不及辦理應先暫修金堤以爲屏蔽茲已派員估勘仍令附近州縣勸諭民夫協修並給津貼共需銀三萬餘兩亦已即日興辦其另築新堤一節俟本平秋汛後察看情形再行酌核更有請者此項大工原爲保護東南災區及運道大局之計故堵決口則必須築長堤既築長堤則不能不資防守而新工大堤長至二百五十餘里又加以防護金堤一百數十里合計兩岸長堤至四百餘里皆無專管之官轉盼大汛卽臨豈暇從容籌議祇好將防禦各營勇分布巡防並以地段過長復飭各州縣督率附近民夫一遇險工竭力隨同搶護以爲一時權宜之計惟防汛必須料物而各省指撥工需銀兩至今報解尙未及半所有堤壩兩工用款均係遵照前奏陸續由司道各庫挪湊接濟此後所需防汛經費仍應飭司覓爲籌撥應用期免貽誤俟各省協款解到再行歸還至將來此項工程之如何修防應設立樞汛改歸經制方期持久應請 勅下部臣河臣通盤籌議奏明辦理實於

河務地方均有裨益 上諭丁寶楨奏現辦堤湖兩工情形請設立關汛一摺著該部會同河東河道總督妥議具奏○乙酉夏至大祀 地於 方澤遺管應恭代行禮○子廣西陣亡總兵張樹珊列入安徽合肥縣祀典○吳元炳奏地方兵燹之餘尤以培養民氣爲要 臣察看江蘇各州縣凋敝太甚戶鮮蓋藏肅清已逾十年而元氣未能盡復推原其故良以盤金之重甲於他省物用無不翔貴民間生計因此日艱但籌餉抽釐事非得已目前支應浩繁豈能驟然易轍惟有酌量裁停以冀稍紓民力查百貨盤金內種和米穀業經前撫臣張樹聲奏明停收卡捐在案 臣思民爲國本食爲民天種和既已停捐而糯米雜糧同關民食爲數究屬不多且雜糧各租又係窮苦小民湊飽充飢之需若仍照常抽取未免偏枯 臣與該局司道通盤籌計內惟黃豆一項本省所產無幾大半運至關東山東專爲碾取豆油之用其豆餅亦係培植種植所需似與民食關係稍輕而捐數較鉅仍令暫行照章辦理外其餘糯米雜糧每年所入本非大宗自應援案一律停免以昭平允此外盤捐各項 臣當督飭在局承辦之員隨時核實抽收悉心盤別總期寬紓一分民力卽培養一分民氣以仰副 聖主子惠元元之至意得 旨允行○丙戌

上諭 觀德殿 穆宗毅皇帝几筵前行禮畢請 永思殿 孝哲毅皇后几筵前行二屬月禮○戊子

上諭 觀德殿 穆宗毅皇帝几筵前行禮○諭前因京師雨澤稀少曾兩次派惇親王奕劻詣 大

高殿恭代拈香並派恭親王奕訢等分詣 時應宮等處拈香同中祈禱現在節逾小滿尚未滙沛甘霖
農田望澤尤殷允宜再申虔禱著遴選光明殿道衆在 大高殿祈禱遴選僧衆在覺生寺喇嘛均於四
月二十五日開壇是日發派惲親王奕諒詣 大高殿恭代拈香○己丑以前任大學士兩廣總督瑞麟
靈柩到京派員勒載徵帶領侍衛十員前往奠醊○庚寅諭王文韶奏請將虧短軍裝並藉故招搖之州
判懲處等語候選州判龍光花投効湖南毅新營承辦軍火等事任意虧短並有招搖擅騙情事殊屬膽
大妄爲龍光花著卽革職永不敘用並不准投効各營以肅軍紀○辛卯諭有人奏聞官復審重案意存
贖徇請派大員查辦一摺據稱浙江餘杭縣民婦萬氏毒斃本夫爲品連誣舉人楊乃武因姦同謀
一案經楊昌濬委員覆審萬氏等俱已供出實情屢用嚴刑逼令照依原供該氏仍堅稱誤信人言因
仇誤鑿實與楊乃武無干等語此案情節極重既經以畢氏等供出實情自應澈底根究以雪冤誣而成
信讞著派胡瑞瀾提集全案人證卷宗秉公嚴訊確情以期水落石出毋得迴護同官含糊結案致干咎
戾○予故廣西按察司蔣益澣於浙江省城建祠○御史劉瑞祺奏上年前督臣李宗羲等奏將江北漕
米改歸海運原聲明俟山東治河事定卽復向章誠以奏改海運者權宜之議酌復河運者經久之模也
而臣竊有慮者平宗羲等奏陳江蘇山東境內漕船難運各情形皆以黃水南趨爲害本年山東撫臣丁

寶楨督辦堤工實爲不避艱勞而於南趨溜勢能否全行挽救尙未可知設使黃流別繞仍益南趨一則淮揚漸受其患欲爲屏蔽之計祇有堵閉一法而江蘇境內之艱阻如故也一則北流之水愈少濟寧以北難以藉資浮送而山東境內之艱阻如故也治河未有定局來年雖欲復河運案可得哉昔孟子云山徑之蹊間介然用之而成路爲間不用則茅塞之矣今日以艱阻之故而停河運此後恐因停河運之故以致各工棄弛節節淤塞而艱阻日甚一日是數百年之運道自此馴就湮廢也是南北之氣脈自此隔而不通也況乎海運非可常恃本年運糧輪船聞有沈覆之患向之樂其便者將來恐咸懼其險若不先事籌防於河運力求擴充之道又何以重倉儲耶臣明知河工辦理之難經費之絀惟度勢審時急務莫先於此應請 飭下管河諸臣速查全河形勢統籌疏治總期河運依時舉行以復向章而維久遠 上諭御史劉瑞琪奏請飭籌修運河復行河運一摺南精運赴邳州近年因河道阻塞改由海運原屬權宜之計該御史所陳現停河運恐各工淤塞日甚運道自此湮廢亟宜迅速疏治不爲無見著直隸兩江山東江蘇各督撫漕運總督河東河道總督體察全河情形應如何設法疏濬俾利漕行之處妥籌具奏○壬辰諭軍機大臣等崇實奏請飭直隸籌撥軍火等語現在奉省操演洋鎗等隊急需軍火著李鴻章在天津機器局內迅速籌備○諭軍機大臣等總理各國事務衙門奏遵議籌辦海防等事宜各摺片雲南

四川廣東廣西福建各邊境均有洋人窺伺並著各該督撫整頓吏治軍政留意交涉事件以固邊防毋得輕啟釁端○以運解漕糧慘遭淹斃優卹浙江海運委員候補同知石師鏞如知府陣亡例○以沈葆楨為兩江總督兼辦理通商事務大臣○諭軍機大臣等南北洋地面過寬必須分段督辦著派李鴻章督辦北洋海防沈葆楨督辦南洋海防所有練軍設局及招致海島華人諸議統歸該大臣等擇要籌辦其如何巡歷各海口隨宜布置及提撥餉需整頓諸稅之處均著悉心經理至鐵甲船需費過鉅著李鴻章沈葆楨酌度情形如實利於用即先購一兩隻開採煤鐵事宜著照李鴻章沈葆楨所請先在磁州壘灣試辦出使各國及通曉洋務人才並著李鴻章沈葆楨隨時保奏○諭總理各國事務衙門奏遵議籌辦海防事宜分別開單呈覽各摺片海防關緊要亟宜未雨綢繆以為自強之計陸軍須歸併訓練方能得力著各該督撫各就地方形勢量為合營併操查一訓練限一年內辦理就緒奏請派員查閱○先是薛福成奏海防密議十條山軍機大臣交總理各國事務衙門彙入各行省大吏議擬海防各摺核議至是總理各國事務衙門奏李鴻章請設洋學局沈葆楨請設特科一節查禮親王世鐸奏及醇親王摺內均未議及而李鴻章所議遣使駐紮日本及泰西各國世鐸等復奏摺內則以為可行其意自謂遣使為一事設學設科另為一事不知欲行而不求所以行之之具及自謂已有其具而不精求所以行

之之具則可行者將何以善其行李鴻章沈葆楨等欲仿漢時詔求出使絕域人才及宋司馬光議設十科之意請開洋學及請設特科原與科目並行不悖並非以洋學變科目且以遣使一節必須預儲人材非設學局以陶鎔之開設專科以拔取之不足以得出使絕域之才其事原為將來次第應辦之件惟查現在情形洋學特科尚非倉猝所能舉行必應先議出使辦法相應請 旨飭下南北洋大臣及沈葆楨等不拘資格各舉所知將各該員才質堪勝任使之處切實保舉此外各督撫暨在廷諸臣如有所知亦可據實保奏以備闕派而資治理將來出使各國之人著有成效中外臣工皆知其有益於國家則於設科設學之舉必且衆論交孚不至再有異議矣奏入報可○癸巳大考翰詹○甲午丁寶楨奏寶莊決口業經合龍臣卽於三月十六日由工次起程由郟城東平一帶順道查看堤工催令尅日完竣以資防範報聞○丁寶楨奏興舉大工籌辦已極艱難造銷尤為繁重此次寶莊堵口工程臣自開辦以至合龍親駐工次未嘗暫離凡料物之購運工費之收支各有專司每日具報事無巨細臣必隨時自行考核不敢稍疎實係涓滴歸公毫無虛耗之弊就堵築二百數十丈之口門工需不及百萬兩用費本極節省然以辦公之情事而論如此辦去斷非河工諸臣之所能故臣初次估報工需時前河臣喬松年兩次函商以堤壩兩工原估約需銀四百七十萬兩為數不敷將來恐至掣肘應切實核計奏增撥款方期應手以備

松年歷年辦工極稱核實此次未敢輕言節省者實以工程浩大一切用費斷非節省所能了事然臣所
可自信者亦祇期事核實使在工大小各員不萌欺飾之念務擴要工至於如何造銷東省尚無成案
又實非臣及在事之各員所能伏查同治十一年堵築侯林大工共用工需銀三十二萬八千餘兩於事
竣後奏奉 諭旨以東省向無河工將用欸開列清單奏咨立案免其造冊報銷此次所用工需除堤工
項下多係藉資民力按里發給津貼原屬官民協辦礙難分別工需應照數存除另行辦理外所有墾工
動用銀九十八萬七千九百五十四兩六錢九分八釐擬請援照前案仰懇 天恩仍准逐欸開列簡明
總數清單奏咨立案免其造冊報銷誠知此次用數比侯工幾及兩倍何敢援案請實緣東省本無河
工於造銷諸未諳悉與前次情形相同且此次丈尺比侯工加多兩倍其工作時日侯工自進占至合龍
計二十四日此次自進占至合龍計八十餘日歷時尚不止兩倍而核計用欸比侯工仍覺節省其毫無
浮冒已可概見是以擬實濬陳非為請免造銷有所趨避得 旨著開單具奏免其造冊報銷○四川布
政使王德固休致調文格為四川布政使○以麻樹森為廣西布政使調英祥為廣西按察使○乙未調
沈秉成為四川按察使以傅壽彤為河南按察使○以宗室載馨糾察麻詐鄉民著步軍統領衙門嚴拿
訊辦○撥甘肅安化武童學額二名歸於志鄉學○丙申 上詣 觀德殿 穆宗毅皇帝几筵前行禮

○沈葆楨奏修築臺郡城垣工程完竣報聞○是月日斯巴尼亞國新簡駐華使臣法樂德抵任○奧大利亞國使臣嘉理治回國史福禮繼之

臣朱壽朋敬編

潘鴻鼎恭校

五月丁酉朔彭玉麟奏臣少更憂患長從軍旅近則鋒鏑餘臣疾臣無日不在憂危困苦

之中目視事局艱難內患外侮伏於無形我 皇上冲齡踐阼 兩宮皇太后垂鑒聽政日理萬幾臣受

恩深重不能稍分 宵旰之憂耿耿此心如負重疚每當中夜徬徨爲國計民生通籌大局誠有亟宜

自強不容一日稍緩者然如購備船廠廣儲軍火籌餉需似自強矣而非自強之根本也論今日之時

勢譬猶大病之後元氣久虛治表尤須治裏又如樹木欲其枝葉茂盛必先培養根株竊不自揆妄抒愚

懇之見竊籌自強之策請爲 皇太后 皇上縷晰陳之一曰清吏治州縣親民之官最關緊要苟不得

人卽爲地方之害卑污貪鄙固當革究辦析查委靡亦當分別降調兵燹以後民生多困實由吏治多

疏各省候補人員流品不一大吏往往優容不知優容於知恥者尙可激勵自新優容於不知恥者適足

養成不肖近來各省風氣往往因候補人員擁擠輪署州縣而實缺轉少從此官常愈壞百姓之受禍愈

酷何也官員之署事譬之住屋之租賃自家住宅稍有破壞急急補治責無旁貸故也若借屋暫居明知

非我之屋不特不加修葺甚至任意糟塌拆屋作薪久之輾轉租賃勢必至棟折榱崩而後已今之委署人員大率類是天下百姓具有天良豈肯甘心悖逆從前悖逆滋事之地非地方官貪酷逼迫則地方官寬縱顛預此中消息甚微關係甚大欲求州縣之得力全在統率之得人督撫者通省之統率也司道者各府之統率也知府者州縣之統率也從前承平之時朝廷視知府甚重京察一等人員道府並用凡擢任知府者屬吏之賢否黜陟得操其權顯得上下相維之本意近十餘年來知府之權輕矣各州縣之於司道督撫分位懸殊情事扞格其中貽誤實非淺鮮臣愚以為欲辨州縣之賢否必專責成於知府各省知府果能勤慎廉明嚴察屬吏於賢者准密保於不賢者准密參仍由督撫司道詳確考核總以有實據為主不逞私臆不徇情面吏治一清天下何患不治擬請旨飭下各省督撫廣求循吏久於其任勿以委署為調劑之具庶不至視官為傳舍而吏治日有起色矣此自強之根本一也一曰嚴軍政自百談兵之非以一語賅之曰兵貴練而已國家養兵數百年司農所入大半以供軍餉乃粵逆創亂震之擁厚祿顯爵者所率弁兵莫不望風披靡豈兵之真不足恃歟將帥習於安逸官弁習於驕肆兵丁習於怠惰吞糧冒餉老弱充數不但兵不知兵將亦不知兵無怪糜爛半天下也今日之情形則又不然向時所謂驕肆怠惰之官弁兵丁業已化為烏有各省水陸提鎮多由戰功擢各省兵丁亦多另行招募非

曠時不知戰陣不習操練者可比自此訓練有方不准沾染習氣自必事半功倍然防微杜漸不可不嚴倘提鎮稍事安逸則官弁卽習爲驕肆兵丁卽習爲怠惰天下事挽之甚難敗之甚易居今日而不痛加整頓則天下之兵又成虛設豈不大可惜哉然欲練兵必先足食兵餉原有定例兵米亦有定數近因經費支絀所發兵餉或七成八成不等且有同在一省所發不一或七月八月十月亦不等至兵米有向在各州縣給領者現亦隨餉或七成八成不等又或每石折銀若干輾轉核扣不足以贖一身又安望其專心操練乎臣愚以爲各省之兵缺額不補則可缺餉少發則斷不可擬請 旨飭下各督撫查明舊制發給滿餉兵米亦照定例發給不准折銀扣食足則兵足老弱不汰自去如有攤扣兵餉吸食洋烟者官弁兵丁殺無赦庶幾軍政日嚴緩急可恃此自強之根本二也一曰端士習夫言自強而歸之士習其說似近迂闊然士爲四民之首人心風會因之轉移軍興二十餘年卒能削平大難由於士氣固結故也古者教士於庠序學校今日之教官猶其遺裔然名存而實不符矣近時士習砥行立名者固不乏人而不顯名義趨利若鶩甚至武斷鄉曲挾持官長者比比皆是州縣容忍調停希冀了事而教官不敢過問此就士之桀驁者言之若夫良懦之儒安分守己偶有小事與官場交涉地方官痛抑之或辱罵之而教官亦不得過問以致士氣不振刁劣監更得肆行無忌皆教官無權故也或曰教官冷曹閒職無法律以

正人心無恩賞以激士氣其隨波逐流委蛇進退亦有無可如何之勢不知教官之不足有爲者由於在上者視爲可有可無之官耳誠能顧名思義問所謂教諭訓導者其義安在昔宋臣胡瑗爲湖學教授設經義治事兩齋以教從學之士千古稱之彼獨非教官乎誠得訪求一二稱職之人樹之風聲予以拔擢天下聞之靡然向風未始非挽回士習之一策擬請 旨飭下各督撫學政時時訪察教官之賢否賢者量加保升不賢者卽行參撤庶幾士林觀感而人心日歸於正風俗日趨於厚此自強之根本三也一曰蘇民困民之困不困於 朝廷之法令而困於奉行法令之人瘡痍之氓生計窮感錢糧原屬正供而浮收勒折民不聊生訟獄本求伸冤而拖累稽延永無了結人命盜案一役下鄉數家破產至於抽釐助餉出於萬不得已各省苦累極矣而百物昂貴其受困終歸於民居今日而欲蘇民困其計果安在哉邦以民爲本民以食爲天仍不外乎開地利而已兵燹後江浙安徽等省荒田極多至今未能開墾議者輒欲辦屯田屢經奉 旨飭查各省大吏俱以爲難行前兩江總督曾國藩覆奏亦以爲窒礙多端未能試辦然則今日之荒田竟將任其廢棄乎 愚以爲欲開荒田仍應聽民自墾非寬其賦稅不可荒田之不墾固由於耕種人少資本太重而究其不敢承墾者實由地方官徵斂太急其中報上司者不實不盡其取諸百姓者搜括無遺耕種之計朝定催科之吏夕來搜籍而稽不遺餘力一經入冊卽使復荒亦必完此

空糧相彼小民何堪此苛政乎誠能寬其禁令甫經開荒者一概不問或種豆麥或種蔬菜或種竹木悉聽其便總使小民有利可圖數年之後利息果厚酌量科徵必須分別厚薄斷不能照向來米數一律起科一鄉如此一縣如此推而至於各府各縣皆如此安見大利不可漸興乎或謂禁令一弛下則攘奪紛爭上則中飽舞弊而公家獨受其損此誠難保其必無然地方官果能盡心民事嚴懲盜劫則諸弊悉除利源不涸豈可因噎廢食坐令數千萬頃地畝育成石田乎擬請 旨飭下各督撫就各省地方情形剴切勸諭多墾荒田寬其賦稅以厚民生而培元氣并通飭地方官嚴懲牙訟棍徒速理詞訟案件不准姑息遷延至釐捐雖不能停不妨酌減一二成恤商卽以愛民自古富強之策未有不從百姓始此自強之根本四也以上四端就 臣管見所及分析縷陳如根本既端一面寬籌餉需廣購船廠軍火等項以備不虞之需庶基址既固規模益闔內外本末無不具矣 上諭彭玉麟奏敬陳管見一摺所奏清吏治嚴軍政端士習蘇民困各條均於治道有裨堪資採擇州縣為親民之官倘不得其人卽為地方之害貧劣各員固應參革究辦庸劣委靡之員亦不宜稍事姑容各直省督撫務當破除情面嚴行考核認真整頓用示激勵近來各省因候補人員較多意存調劑州縣各缺輾轉委署以致任事之員視官守如傳舍並不盡心民事貽誤地方莫此為甚嗣後督撫等慎選循良俾令久於其任毋得稍涉徇私率行更署以期吏

治日有起色各省營伍亟應力求整頓該管大員認真校閱勸加訓練倘該管將弁有攤扣兵餉並性耽安逸吸食洋藥等情卽著分別參辦從重治罪學校爲儲才之地欲正人心宜端士習教官職司訓迪非學行素優之員不足以資矜式著該督撫學政隨時訪察賢者量加保獎不賢者卽行參處俾士林知所觀感各省兵燹以後民困未蘇地方各官自應妥爲撫恤該侍郎所奏正供之外浮收勒折民不聊生積案拖延無了結甚至縱容蠹役魚肉鄉民一役下鄉數家破產此等情形實堪痛恨著各該督撫等嚴飭所屬痛加稽覈倘有不肖之員玩視民瘼任意攤派卽行嚴參懲辦從前被兵省分荒田尙多著各該督撫體察情形勸諭開墾寬其賦稅以示招徠並督飭承辦各員妥爲經理勿滋弊端○戊戌調蘇勒布爲盛京禮部侍郎麟書爲理藩院右侍郎○瑞琳奏熱河承德一府管轄六州縣地方遼闊蒙民雜處政務殷繁其東與盛京地方接壤西北與圍場及多倫諾爾等處交界皆馬賊出沒之所尤關緊要倘州縣用非其人則措置失宜卽多滋擾欲振興吏治所貴揀補得人欲整頓地方必須情形熟悉伏查向章濼平豐甯二缺定爲一調一補輪應調缺出由奴才會同直隸督臣先儘內地現任理事同知通判德員調補如不得其人再於現任撫民同知通判及滿漢州縣內一體揀調如輪補缺出卽於熱河揀發州縣按照名次酌量請補其平泉建昌赤峰朝陽四州縣缺出由濼平豐甯二縣揀調如二縣內無堪調

補之員卽由奴才會同直隸督臣於現任理事撫民同知通判內曾經署理州縣及滿漢州縣內堪以勝任之員請調如此等人員現居要缺未便顧此失彼則於揀發州縣內曾經委署地方並無貽誤者題署俟一年後再請實授等語是熱河州縣缺出除輪補之缺以揀發人員請補外餘皆先儘內以同通州縣實缺人員揀補無論內地人員或現居要缺或於例未符一時揀調爲難卽使遴選有人而久官內地於口外情形未必卽能洞悉設或人地不甚相宜仍須撤換另補似非慎重員缺之道且查奏定章程之始熱河需次人員不過揀發數人均係甫經到都是以酌議章程遇有缺出先儘內地人員揀調今則除揀發班外有候補班人員有留熱補用班人員並有曾經署理州縣者類皆當差多年諳習地方情形今昔時勢不同如必拘守舊章選就揀補勢必人地生疎者得以調任繁區而情形熟習者轉難序補實缺非所以慎重地方亦非所以鼓勵人才奴才再四思維擬於遵循之中略寓變通之意合無仰懇 天恩請嗣後豐灤二縣缺出無論應調應補皆由奴才會同督臣先儘口外揀發各項人員請補如不得其人再由內地照章揀調其平建朔赤四州縣缺出仍由豐灤二縣內調補如二縣內無堪調補之員亦由奴才會同督臣先儘口外揀發各項人員選據請補如不得其人再由內地照章辦調如此變通於舊章並無更改不過一轉移先後之間而熱河州縣可冀得人地相宜之益卽需次人員知序補有期當更踴躍

從公講求吏治於人才亦不無裨益下吏部議奏○己亥左宗棠奏本年輪應查閱營伍甘肅省各營兵
兵獲後未復請願請屢至下屆允之○李瀚章請同辦奏湖北省同治十三年分漕米仍難徵收本色酌
議採買米三萬石由海運通經臣瀚章於上年十月初八日在兼署湖北巡撫任內由驛陳奏在案嗣准
部咨令將採買章程核實具奏並聲明米價運費必須較江浙成案大有節省等因當經轉飭遵辦去後
茲據督糧道何維鏡會同布政使林之望詳請會奏前來臣等伏查鄂省試辦採買海運事屬創始必須
擇人而理因思總辦招商局委員浙江候補道朱其昂血隸候補道盛宣懷歷辦江浙漕糧於海運情形
最為熟悉且有江浙成規可循是以責令承辦承不致漫無限制旋據朱其昂等具稟籌辦大概情形
並據陳明一切事宜俱係仿照江浙近年成案辦理今湖北採辦交倉正米三萬石照章於正米之外應
添買商耗漕食暨新增制耗各米二千九百餘石併入正米之內核銷現因訪查鄂中米價較下游昂貴
已漢委委員赴江皖產米之區分途採辦和米陸續運滬儲棧以備春融起運至此項採買米石亦應照
章俟江浙正漕報完卽由局駁運赴通交兌但楚省距辦運之處均在二千里以外所有領解銀兩採辦
米石在在需費與江浙就近辦運者難易懸殊其米價運腳勢難較江浙減少惟有盡心籌畫諸從節省
一俟米石運通交卸後核計支銷價值確據實開報不敢稍有虛糜等語臣等復加查核所陳尚屬實

情仍當實力督飭益求撙節每米一石併計正耗價腳縱不能於江浙採買成案再為減少然亦不得於二兩五錢零之外大為增加期歸核實至於動用漕項飭令糧道按照起運正漕三萬石之數在於漕糧正米折價款內動支銀三萬九千兩又於隨正耗米折價款內動支銀三千九百兩共計動支銀四萬二千九百兩此外尚有不敷即遵部臣以漕濟漕之議於濟運之隨漕水腳免費項下開支濟用不准動用別項正款俟辦運事竣由糧道查照江浙成案核實報銷再督運漕糧本係糧道專責此次採運米數無多既已委令招商局員承辦即由該委員朱其昂等一手妥為辦理毋須糧道督運鄂省並不派員前往幫勸以專責成而免諉卸等一面督飭糧道嚴催各屬趕將全漕折價徵完解濟京餉不任延誤庶本折可期兼顧矣得 旨戶部知道○諭李鴻章奏已故督臣遺愛在民請建立專祠崇祀名宦一摺已故大學士兩江總督曾國藩自同治七年調任直隸總督舉賢任能整頓吏治以及治河練兵清理訟獄於地方利弊切實講求皆有成效並因天津河間水災籌助賑銀實屬遺愛在民著准其於保定省城由該紳士等捐建專祠地方官春秋致祭並准附祀省城名宦祠以彰忠德○辛丑 上詣 觀德殿 穆宗毅皇帝几筵前行禮○壬寅京師旱甚遣惇親王奕誼詣 大高殿恭代拈香○諭延煦畢道連奏抽查漕糧滿御史就延運務據實奏參一摺京通轉運漕糧必須迅速查驗庶免駁船守候漕糧亦不至受侮

乃抽查漕糧滿御史全善不肯多加驗數經延煦等兩次行文催促該御史擬若罔聞實屬任意耽延且據奏稱該御史操守亦甚平常等語全善著回原衙門行走並交部嚴加議處所有滿御史抽查漕糧差使著都察院開單奏請簡派○癸卯諭丁日昌奏為添增劇請假回籍調理一摺前江蘇巡撫丁日昌著前赴天津幫同北洋大臣李鴻章商辦事務並賞假兩個月安心調理○李鴻章奏直省輪升同知直隸州知州章程向以大興宛平兩縣升補一次再以順屬直隸人員升補二次原以大宛京縣缺瘠事繁非比外府首縣故升途亦較優異惟同知直隸州缺出本不儘應升一途而應升中又有卓異勞績循例三項且卓異人員按照新章應先儘升用員缺祇有此數人數逐漸加增直隸州缺少人多益形擁擠查京縣地居衝要差事本煩所藉以鼓舞者向惟升途一項今直隸州一缺往往到班需時而日久貽誤不支深恐貽誤非所以示體恤而勵將來似應量寬升途期於公事有裨除同知一項輪升尚易無庸議外據藩司孫觀象司范梁擬請將遵化易州兩直隸州知州嗣後缺出先以大宛兩縣知縣升補一次再以順屬直隸人員升補一次另立輪升一班如遇該兩縣到任未久或人地未宜一時無堪升補應以順屬直隸人員內揀選不積輪升班次此外直隸州各缺仍照向章辦理如此最為變通則該兩縣升途較寬庶昭激勸等情具詳前來臣等覆核無異所擬尚為平允謹會同兼管順天府府尹臣萬壽齡順天府府尹

臣楊慶麟合詞恭摺具陳下吏部議奏○李鴻章奏據長蘆鹽運使林述訓詳稱蘆商正課例限五月奏銷自同治十年後因迭被水患節經奏准緩至十月放徵茲以例限將屆催令各商完納旋據通綱商人稟稱該商等疲累情形本非一日加以連遭災歉元氣大傷迭蒙展緩奏銷原冀銀鹽價減成本稍輕積困漸蘇課限漸復無如鹽灘當積澇之後留存既已無餘新收其形短絀前次尙可赴奉天採買接濟現又奉文停止以致鹽價愈昂其銀價仍屬無減成本過重照折實多現當籌措資本辦理春運又須補交上屆正課尼欠及未解帑利已屬萬分拮据轉瞬五月奏限若新課同時並徵商力實不能支懇仍展緩該司詳加體察委係實情計自上屆奏銷至今由及半載春運資本尙缺力難交課若催辦太促恐致課運兩誤請照案緩至十月放徵等情具詳前來臣查長蘆正課前因商力艱窘迭請展緩均已奉旨允准而應撥京奏各餉仍係年內添解清欸並無貽誤今商力未紓勢難復舊該司所詳係爲恤商顧課起見相應籲懇天恩俯准將光緒元年正課奏銷照案緩至十月辦理屆時仍由臣督飭運司實力催徵無誤額撥京奏各餉以期兼顧允之○甲辰上詣觀德殿穆宗毅皇帝几筵前行禮○以剿匪不力革金州副都統毓福職○張兆棟奏遵旨酌議考試官員以清仕途報聞○乙巳崇實奏抵奉以來察看本省馬步練兵年力頗多精壯當差亦尙奮勉惟查帶隊各官半未涉歷行閱於營陣教演之法類

屬生疎且皆本地人員難免諸事瞻徇自非量爲變通不足以資整理查有奏帶來奉之儘先副將左寶貴記名總兵王佐臣該二員熟悉營務曉暢戎機茲暫派左寶貴統帶八旗馬隊王佐臣統帶鎗炮步隊飭令認真操防務收實效報聞○丙午兩○諭給事中陳鴻斌奏本月初五日 觀德殿 永思殿致祭

之期各衙門行禮官員人數寥寥請照例齊集行禮一摺典禮攸關禮宜倍加敬慎嗣後致祭日期著禮部太常寺知照各衙門照例齊集行禮毋得稍形疎懈○丁未又兩○諭軍機大臣等劉長佑奏防剿越南逆匪河陽爲黃逆老巢水陸可達滇省其普高地方亦緊接滇疆現在粵軍進攻河陽並擊剿普高賊匪該逆被剿窮蹙難保不伺隙奔突著劉嶽昭岑毓英多派兵勇於沿邊各要隘嚴加防堵毋任匪蹤紛竄○諭沈葆楨等奏南路剿番攻克各社情形一摺准軍自到臺後艱苦出力准其擇尤保獎以示鼓勵○戊申 上請 太和門閱看 冊 覆畢請 永思殿 大行嘉順皇后几筵前行禮○恭上 大行嘉順皇后尊諡曰 孝哲嘉順淑慎賢明憲天彰聖毅皇后○己酉文治奏杭州織務情形驟難規復請制請暫照市價採買允之○諭劉長佑奏官軍攻剿越南賊匪克復城池出力陣亡各員并開單懇請分別獎卹一摺越南匪首黃崇英喊令陳亞水等分擾保樂州經道員趙沃率隊分擊淦臺社及那晚等處賊巢先後將同文土州暨茶平底定等城寨攻拔斃賊無算匪目林亞新被鎗轟斃其提督劉玉成一軍

進攻派社一帶股匪迭有新擒將逆首鄧志雄擊斃諒山已無賊踪在事出力各員弁均屬著有微勞自應量予獎勵所有單開之副將莫雲成著賞給總兵銜並賞換晉德本巴圖魯名號參將覺敏宜著免補參將以副將儘先補用並賞給勝勇巴圖魯名號黃義德著賞加副將銜並賞給猛勇巴圖魯名號副將宋福慶著賞給勳勇巴圖魯名號都司李石秀等均著以游擊補用○庚戌總理各國事務衙門奏查從前辦理洋務輕重失宜皆因未能詳悉情形所致此次條議內有以擇交儲才出使爲要者亦以天下事得人則理無事無時不應儲才而於出使一事爲尤亟歷代以來凡出使絕域者莫不極一時之選如宋之富弼蘇轍等皆以名臣大儒膺此職任我朝康熙年間曾有遣使至俄國事誠以兩國交涉非使臣往來其間卽虞隔閡而膺是選者尤貴得人所以使於四方不辱君命屬諸才德兼備之士非細故也近年來士大夫心乎時事者亦能逐漸講求不至如從前隔膜之甚然時事艱難日甚一日且交涉事繁關繫至重大小臣工皆當急難爲懷悉心討論倘內外諸臣均能灼見彼此情形則遇有交涉事務既可共濟時艱而使才亦於是乎出特才宜漸儲而時不可失臣等因於本年四月二十六日覆奏摺內請將王大臣議准出使一節飭中外大臣各舉所知業蒙 允准除各督撫大臣已有旨飭令保奏外茲由臣等查得主事陳嗣彬員外郎李鳳苞編修何如璋知縣徐建寅道員許鈞身典簿葉源楷編修許景澄

主事區謂夏同知銜徐同替共九員另繕履歷清單恭呈 御覽除陳蘭彬出洋有年熟悉情形現在堪

膺是選外其餘八員係由臣等采訪所知多未經晤面者原冀拔十得五竟以儲才以備他日遴選之資

惟臣等耳目有限鑒識難周在 廷諸臣同有以人事君之責平時物色所及必有志節堅卓之才堪備

國家任使應請 旨下在京王大臣大學士尚書侍郎京堂等遵照前 諭不拘資格切實保舉擇其志

節堅定才識通達或並能熟悉洋情邊防將各員所長詳細奏明遞應請 簡用時與各督撫大臣等

保舉各員一體遴選請 簡如慮各該員才識雖極閎通而情勢未能詳悉應於保奏後調取各該員至

臣衙門隨時探訪以期諳練如蒙 俞允卽由 臣衙門抄錄原奏行文在京各衙門遵照辦理得 旨允

行○楊昌濬奏承准軍機大臣字寄同治十三年十二月十一日奉 上諭楊昌濬奏辦理聚眾抗糧匪

徒情形一摺等因欽此遵 旨寄信前來當卽恭錄轉行欽遵在案旋據營務處道銜候補知府張鑑南

等稟稱查明該縣西鄉下六都被脅各莊均願查匪捆送何知畏法其莫坤和布督隊奮擊格斃悍匪過

阿水等數名擒獲匪犯官胡煥等五十餘名奪獲擄炮十三位鳥鎗十六桿刀插旗幟六十餘件台州同

知成邦幹等復在後岸潢水街頭潘鼎洋等處拿獲首匪沈修恆等二十餘名並據各紳耆繳到被搶原

贓一百餘件鎗械五百餘件匪寨當時踰毀所獲各犯業經台州府知府徐士鑾督飭研訊首匪沈修恆

徐維閣王方林李得潤龐立才萬仰懷官胡旗蔡茂之陳錫玉陳胡英陳國月等十一犯均供認持械入城放火搶奪官物拒斃勇丁並傷縣令各情不諱實屬異常凶暴法無可貸已於訊明後欽遵前奉諭旨就地正法為示以昭炯戒夥犯陳安牛等五十餘名訊係被脅入城委無違犯搶奪分別責懲保釋各花戶應完錢糧現均陸續輸完良民照常安堵等情先後具稟前來除飭將派撥兵勇分別撤回仍由地方營縣隨時查拿逸犯務獲究辦外至天台縣知縣丁澍良徵收錢糧雖尚無浮勒情弊究屬辦理不善咎有應得聞紳附生葉樹春禮匪被害並懇 敕部照例議卹得 旨丁澍良著交部議處葉樹春著交部照例議卹○辛亥 上諭 觀德殿 穆宗毅皇帝几筵前行禮○工部門神庫失火堂官以下分別交部議處○壬子命李瀚章往雲南查辦事件以翁同龢兼署湖廣總督○諭軍機大臣等本日有旨派李瀚章前往雲南查辦事件著即迅速赴滇將馬嘉理被戕一案遵旨查覆暨滇省礙難通商現在撫綏土司各摺片咨毓英惟當飭令楊玉科等審慎籌辦一面妥為布置自固邊防毋得冒昧從事以致不可收拾洋人在雲南通商既屬礙難行果能設法阻止自為盡善著李瀚章會同該督撫籌度機宜妥慎辦理○甲寅以京師得雨未足遣惇親王奕諒請 大高殿恭代拈香虔申叩禱○刑部科房失火堂官以下分別交部議處○諭軍機大臣等金順泰馳抵古城扼紮濟木薩防護屯種暨糧餉艱難情形一

摺金順由巴里坤督隊西進於三月間行抵古城該都統以奇臺縣屬西集爾地方近接南山賊匪最易出沒已派馬步各隊伍駐紮即著飭令聯絡聲勢嚴密設防據奏濟木薩西近三臺更接古城該處僅有禮字等營屯紮兵力尙單現在督軍進紮等語前已有旨命左宗棠以欽差大臣督辦新疆軍務金順調補烏魯木齊都統仍幫辦軍務並接統景廉各營該都統現已前抵古城著景廉即將各營兵勇糧餉移交金順接管金順統率全軍所有調度機宜均歸區畫究應駐紮何處方爲相宜著左宗棠金順通籌全局毋誤戎機其濟木薩地方是否必須該都統進紮或酌派隊伍前往以資防護屯種之處並著斟酌情形妥爲辦理古城糧撥缺乏亟應妥籌接濟著左宗棠懍遵前旨源源運解以期士飽馬騰各省關應協金順軍營餉銀山西四川兩省每年應協銀二十四萬兩僅據山西撥解一萬五千兩四川撥解六萬兩江海江漢粵海三關每年應協銀二十四萬兩僅據江海關撥解十萬兩江漢關撥解六萬兩粵海關撥解三萬兩現在該營份餉甚殷著李瀚章英翰吳棠劉坤一翁同龢吳元炳鮑源深張兆棟文格即將各省關欠解協餉迅速撥數按期撥解毋稍延緩並著左宗棠咨照陝西巡撫俟前項協餉解到時即由西征糧臺迅解金順軍營俾應急需將此由六百里諭知左宗棠金順景廉李瀚章英翰吳棠劉坤一翁同龢吳元炳鮑源深張兆棟並傳諭文格知之○御史余上華奏國家歲入自有常經從古聖王臨

御末有不量入爲出而能裕經費之源者近自軍興以來用兵二十餘載以致帑藏空虛迥異往昔中外用款支絀日甚臣思戶部爲天下財賦總匯之地若不及早理其源而節其流誠恐泄沓日久支撐愈難雖經臣工迭次奏請至今出納各款仍未確切籌維擬請飭下部臣將按年歲入正項地丁鹽課關稅以及續徵津貼捐輸釐金洋和各雜項共有若干開具簡明清冊其有不能指定確數之款亦可比較數年酌中核計並由該部堂官督同各司官將按年實用京餉廉俸暨陵寢要工神機營兵餉爲一款各省應留俸餉雜支爲一款各省旗綠各營額設官兵俸餉爲一款各省練軍防勇應又餉需爲一款西北兩路征兵應撥餉需爲一款以上各款總計實出若干亦分晰開具簡明清冊與入數互相比較實虧若干應如何酌量撙節先事編緝之處由該部妥協綜核彙總開單具奏以備查考至各項用款該部有疑難不能速定者不妨約舉大概據實奏明請旨定奪如此通盤合計先事確有持循將來庶無貽誤再財用等事在部臣亦經悉心籌畫而行查各省往往延不登覆以致出入各款久無確據並請飭下部臣於行查事件該省逾限不覆即行指名嚴參懲處上諭御史余上華奏請飭部通盤籌畫變通衷益以節虛糜而防匱乏一摺著戶部議奏○御史余上華奏戶部職掌財賦現值庫款支絀關繫尤重軍需局稽查各省報銷准駁動盈鉅萬捐納等款爲數亦多該部堂官職任殷繁所恃以總核句稽全在該

管首領司員認真確查以期出納有經財用不匱風聞戶部郎中散績於該部緊要各差無不兼綜其事該員質本輕浮性尤狂悖辦公每多顛預遇事一味把持人言噴噴咸謂戶部大局勢將因散績之專擅壞不可支在該員處極高事並不知國計所關鉅細而呼朋引類將使遯廉鮮恥之徒胥居要地誠恐國家度支囑囑銷耗於無形不可數計伏思 皇上冲齡踐阼 皇太后垂簾聽政整飭庶務聖鑒欵維艱時區 聖慮而以錢糧總匯之區任令劣員罔上營私於部務大有關係 上諭御史余上華奏戶部郎中散績質本輕浮性尤狂悖辦公每多顛預遇事一味把持等語著派寶鋆毛昶熙秉公查辦據寶具奏毋得稍涉徇囑○乙卯祀 地於 方澤○諭金順奏肅州轉運局員縣丞李玉白不安本分蕩檢閑閑總兵張紹林充當稽查委員亦多謬妄均著革職勒令回籍不准投効軍營○鮑源深奏河東鹽務自改爲官民並運以來歷屆四月奏銷之期年清年欸嗣因豫陝迭被賊擾引鹽積滯致難依限造報節經前撫臣暨臣奏請展緩奉 旨允准在案查甲戌綱鹽引經臣檄令河東道認真督催期於今年四月以前運銷完竣以符奏銷正限無如豫陝兩省目下雖已平靜然自遭搶劫蹂躪以後元氣未復潞鹽行引地方俱未暢銷兼之豫省蘆鹽汴鹽較潞鹽價賤紛紛浸灌以致潞鹽銷路愈絀即本省州縣亦以腳價日昂成本過重運銷未能暢旺現屆四月奏銷之期據河東道升泰查明未經封課者尙有二千二

百餘名封課而未運發者亦有三千餘名雖經竭力督催未能如期封運完竣勢難依限奏銷據案詳請具奏展緩前來臣查潞鹽行銷地方或因曾被賊擾而民氣未復或因成本加重而商販力疲以致引鹽壟積未能依限奏銷委係實在情形合無仰懇 天恩俯准將甲戌綱鹽課奏銷展緩至本年七月內造報以紓商力而免貽誤得 旨如所請行並下戶部知之○丙辰 上諭 觀德殿 穆宗毅皇帝几筵前行禮畢詣 永思殿 孝哲毅皇后几筵前行三周月禮○戊午兩○己未廣安奏學校為作人之地人未有不陶成於此而明修己治人之術者也京師八旗子弟各設官學以教習之值辰戌丑未年欽派大臣於舉貢中考取教習分列各學造就人材每歲支以衣料公費及滿三年復以知縣等官獎叙足見 國家取士之途不隘是一舉而兩善矣乃近聞各學平日無人肄業迨稽察大臣考學時始知會教習傳集生徒事後依然空空堂至三年報滿之日循例保獎甚至半年後即捐免年滿亦得獎叙是明教之地作人之用轉為舉貢開一倖進之途方今物力艱難貧者無力讀書富者捐資為郎所以端風化正人心蓄賢才培 國本者正賴有此學耳而乃視為具文虛糜如是洵不可不汲汲振起者也擬請飭下稽察各學大臣實力整頓司事人員悉心照料所有日程月課嚴定規條以備隨時稽察每屆三年仍 欽派大臣認真考核隨其功效以定等第 上諭內閣學士廣安奏八旗官學請飭實力整頓嚴定

課程認真考核等語該部議奏○庚申 上詣 觀德殿 穆宗毅皇帝几筵前行禮畢詣 承思殿

孝哲毅皇后几筵前行禮○以京師得雨遣惇親王奕諒詣 大高殿報謝○崇實奏請停派吉林湯外專查鹿窖協領從之○壬戌諭都察院奏前浙江嘉興府乍浦理事同知志文以大計參劾不公等詞赴該衙門呈訴據稱伊歷次差委署事均無貽誤被參屈抑並此次大計內有海甯州州判朱勳鉞青田縣知縣王承霖業經列入旋因徇情撤銷另以他員抵補等語著胡瑞澂確切查明具奏○岑毓英奏滇省採辦京銅請分作兩起運解允之○癸亥允奕榕奏嗣後各省官兵暫緩征調○甲子諭內閣侍讀學士廣安奏止途人員選缺壅滯請飭變通章程一摺著禮部議奏○乙丑河南巡撫錢鼎銘卒予恤如巡撫例謚愍○以張瀛爲山西布政使周恆祺爲廣東按察使○是月丹麥國使臣拉斯勒福赴日本由俄使布策代辦使事

六月丁卯戶部奏請將各直省留防兵勇酌量裁汰從之○戊辰 上詣 觀德殿 穆宗毅皇帝几筵

前行禮○己巳 上詣 觀德殿 穆宗毅皇帝几筵前行禮○嚴禁廣東鬪姓賭局○予安徽旌德縣

孝子呂國梁旌表○以勦賊不力革吉林將軍奕榕職發往軍臺○陳彝奏國家欽恤庶獄罪疑惟輕但有一縷可原必予以生全之路仁至義盡無以復加矣但法雖至當仍須慎防法外之弊然後實惠可以

及民。謹就見聞所及條呈如右。一京控不宜含糊也。案至京控，未有不並承審之州縣而控之者。而所控情形，又皆涉於差役舞弊者居多。近來奏結京控之案，大抵於差役則云並無其事，於原告則云懷疑妄控，夫並無其事，則可免處分，懷疑妄控，則不至坐誣如此。而謂非調停迴護，得乎應請飭下大吏，破除情面，務順民心，果係健訟之徒，不妨嚴辦，倘實有冤抑，當深念一家一路之義，卽予平反。庶吏治可以肅清，而許訟亦可漸息矣。一株連宜卹也。罪囚入獄，例有衣糧，而因案羈候之人，向無如何贍養。明文竄則一入班房，生死卽在胥吏之手，富者有可賄託之資，貧者更甚罔罔之苦。夏則穢惡薰蒸，冬則饑凍交迫。至於提省待質，則生理全無，親友盡絕，案證不齊，永無開釋之日。往往一案中正犯緩決，減等轉得生全，而牽連之人，輾轉死亡，無可稽考。此誠仁人之所不忍聞也。臣愚謂易戒留獄，果能盡心研詰，何須牽涉多人，其不得已而提省待訊者，應仿照囚獄之例，酌撥公款以資養贍，仍專派候補官一員專司稽查，造具每月四柱清冊解送上司查核。每年計其人數存亡多少，以爲功過，似亦仰體國家好生之德之一端也。一非刑宜禁也。恭查嘉慶十六年上諭，嚴禁非刑，已有鸞哥架天秤架之名。本年直隸奏結慶雲胡文振京控案，有用木樁毆傷腳踝之事，足見此風猶熾。聞北省辦案，有手提兩耳令其植立逾時，氣脫者有摩其腹使氣上湧一撲而亡者，此非刑之尤虐者也。南省則有老虎橛之名，其法起於常

熟縣知縣汪地厚其平日督人以一千爲度有汪一千之號夫酷刑本干例禁在擾攘之際或有不得已而示威者今則何所藉口大抵以酷濟貪而已應如何禁止查辦之處伏候 聖裁一發審局員宜慎擇也各省會例設發審局員既與上司親近審結案多便得儘先補署以故分發人員無不營謀此事臣愚以爲人命至重以講求律例言之則入仕日淺者非所宜也以哀矜庶獄旨之則天資刻薄者非所宜也以歷練民情言之則少年喜事者非所宜也應令各省每年將派入發審局員各該員經手斷結者何案並各員履歷一併造冊送吏刑二部及都察院查核如有冤濫發覺照承審例處分以稱 朝廷慎重人命之至意又奏爲國者不患用之不足也莫患乎取之已盡取之已盡則將以不得已於民者爲常類萬一復有水旱兵革意外之用將於何取之溯自癸丑以後如設卡抽釐等事出於常制之外者多矣兵燹之際竭力供億以冀昇平今中原幸無事矣而未能與之更始此臣所爲隱憂也今日之事惟有力求撙節剔奸弊以節其流而額外之徵可減則減留有餘以爲無窮之計臣敢就見聞所及條陳之一端免宜妥籌也本年春間欽奉 恩綸酌免民欠二三月來未知部定章程如何事關調和曠典似宜從速俾得早沐 皇仁至州縣以完作欠積習相沿致有免官不免民之議應如何設法照例勿令猾吏藉爲洗清虧空之具此則尤在部 臣 疆 臣 悉心經理也一釐卡必須歸併也 臣 籍隸江蘇揚州自揚州至淮

安三百里中間灣頭邵伯車邏馬棚灣界首驛子嬰關汜水鎮寶應縣爲釐卡者八此特南北大道耳其他如裏下河一帶商賈所經者不知凡幾此特淮揚二府之地耳其他江蘇通省以及他省不知凡幾加以胥吏之需索行李之留滯民將何以堪之又有一局而兩捐者則以江北兼隸漕河總督別有漕捐夫釐捐本非得已正以流黔甘餉均須接濟礙難裁耳若漕督並無籌餉之責徐州唐定奎一軍久赴閩省兵勇隸於漕臣者諒亦無多此尤當急議裁撤者也一米穀應一律免捐也查釐金內之粳糯米穀經前蘇撫張樹聲奏明停捐頃撫臣吳元炳復將糯米雜糧一併停免惟蘇撫所請以及蘇藩管內而江甯藩司所屬湖漕情形甚於蘇州尙未及之應請飭下督撫將以上二項釐稅通行停免以稱朝廷軫念之至意不獨米穀流通有裨民食而農人得有餘利則荒田漸闢正賦自充所謂藏富於民者此也一加派之端萬不可開也恭查康熙年間有永不加賦之旨萬姓謫思至今無敢從古恤下之仁未有一深於我國家者也嘉慶以後帑藏漸虛而事近加賦概不准行迨道光年間江督復有八折收漕之議經侍郎湯金釗御史王家相濫陳其弊旋亦停罷夫官吏經徵不無沾潤非一日矣然終不准一字議加蓋浮收猶是陋規加徵遂成定額懸浮收之禁縱或官吏辦公間有不足而民氣永安民心悅服若懸陋規之弊改爲定額異日又將以定額爲固而有增加增陋規實使官處其難勿使民罹其害此正列聖所

以垂裕於萬年也同治年間東南大亂初定重議徵收章程往往將公費定為若干併入應徵正額未始非澄清吏治之苦心然臣風聞蘇屬收糧耗米折錢已逾三斗之數江西則官紳相爭已見奏牘與其更新而滋弊何如守舊而相安應請 諄諭各大吏型躬率屬以儉養廉萬勿於常賦之外輕議加增絲毫民生之幸社稷之福也再 國家財賦之計多在東南臣籍隸江省處所聞見入告合併聲明又奏 臣維齊臣管仲天下才也其言曰禮義廉恥國之四維唐臣魏徵佐命之賢相也其言王者不易民而治凡皆以人心風俗為兢兢也我 國家崇儒勵學治具畢張而邇來風氣日趨卑下仕宦惟求遷擢而不思爵祿之所自來士子專務揣摩而不思科名之所以重至於俗敝民流寡廉鮮恥殆有月異而歲不同者臣目擊頽波心憂世道幸際 朝廷孜孜求治之時敢具陳之一講約宜實力舉行也謹按宣講 聖諭即古懸書讀法之遺意 列聖相承迭奉 明詔自宜海內嚮風乃積久相忘徒懸令甲是 臣所未喻也夫講約非他不過教愚民以禮義而已不知禮義而貪利無厭充其量必至為盜不知禮義而好勇鬪狠充其量必至抗官即如粵逆初起不過金田會匪耳藉使山野之民稍知天理王法何至從亂如歸若是乎查江陰舉人鄧經力行鄉約刻有成書近年直省亦有演 聖諭為歌謠以導愚民者伏祈 皇上渙發德音以重其事俾官吏庶敬謹奉行未必異日不收其效也一禮教宜亟講也夫吉凶之道不得相兼

所從來者遠矣京師首善四方所瞻而每有三年之制未終已辦嫁娶者至如功令假期之外照例趨公因而若無其事良由會典通禮不能家有其書愚者不知賢者亦牽於俗而不能自立也擬請 飭令禮臣將通行婚禮祭禮之類準今酌古定爲簡明禮書請 旨刊布遵行似亦善俗之一術一奔競之習宜力杜也夫欲貴者人之同情然宋臣張師德兩及執政之門而爲王巨所薄張泳亦云舉人宜舉好退者古之人非不近人情也聖賢論士有恥爲先夫端方正直近於有恥造請逢迎近於無恥此顯而易見者矣辰下實錄將次開館需用校對軍機章京將次傳補完竣卽須保送轉移習端在此時敬請 飭下諸大臣力矢公忠刻刻以爲 國求人爲念自然舉錯悉當舉情悅服是臣所朝夕惓惓者也 上諭御史陳轅奏縷陳管見請清刑罰平稅歛並整飭風俗各摺不爲無見各省京控案件理應秉公訊斷不得調停迴護嗣後各省督撫務當嚴飭所屬認真辦理果係健訟之徒自應嚴懲倘實有冤抑卽予平反各省辦理案件尤當嚴禁非刑稽查株連其實應擬禁待訊者卽仿照囚糧之例撥公款以資養贖仍派員稽查按月造冊解交該管上司查核所有摺用各種非刑並著一例禁止以示矜恤省會發審局宜慎擇賢員經理嗣後各省應將每年派入局員並各員履歷斷結何案逐一聲明報部查核如有冤濫卽照承審例處分至各省元氣未復尤應體恤民艱朝廷調和賦典務期實惠均霑豈容不肖州縣以完爲久著

該督撫隨時稽查痛除積習各省幣局迭經諭令各該督撫分別裁併所有江北捐江甯米穀捐刻下
應否裁減著該督撫等斟酌情形奏明辦理錢漕正供向不准額外浮收屢經降旨嚴飭各該大吏自當
整躬率屬嚴剔弊習不准於常賦之外私意加增用副朝廷恤民至意舉行請約原冀海內向風但積久
相忘轉致視為具文著再申明舊例務令實力奉行俾得家喻戶曉而維持風俗禮教尤宜講求著該部
即將會典通禮內有關民間吉凶禮節者刊布通行以資法守至奔競逢迎爲仕途惡習嗣後各衙門各
館保送保舉及考取各員該堂官均宜一秉大公嚴杜請託等弊庶幾振興士氣力挽頹風朝廷實有厚
望焉○劉坤一奏臣於二十三日行抵上海查看機器局各廠該司正在監造鐵甲輪船及各項鎗炮鉛
藥頭緒極爲繁多臣以西洋船炮口事新奇而中國經費有限應否先行擇其得力合用者與直隸福建
各局分途製造各等名義以期精熟而收成功擬與直隸督臣李鴻章及海防大臣沈葆楨妥爲商酌旋
由上海起程履勘各處新築炮臺查吳淞口炮臺已有七八分工程該處雖不足以關鎖長江亦可捍衛
蘇松各郡當飭趕緊修築江陰水面收束實爲長江第一重門戶現築之鵝鼻嘴一帶炮臺洵足制敵惟
大石灣地勢太縮飭令不必多築而於下游添築兩座以固藩籬其江陰北岸初築一座尙在未成餘皆
僅築基址該處與南岸各炮臺對恐兩岸開炮時均有窒礙臣與前兵部侍郎彭玉麟而商飭令停止

而於北三里之十圩港地方另築數座庶與南岸互為犄角鎮江之焦山象山都天廟與江甯北四十里之烏龍山沙洲圩等處炮臺均得形勝而焦山象山都天廟三方犄角尤為扼要惟炮門略為修改以期合法此外鎮江下之關山關亦屬險要之區須候經費稍充從容布置至江甯下關炮臺近在堂室略壯觀瞻此三股劫沿江炮臺之實在情形也奏入報聞○辛未命欽天監於九月丙敬謹選擇 穆宗毅皇帝 孝哲毅皇后梓宮奉移 山陵吉期○浙江新昌縣滋事匪首土成繼等就擒獎敘出力員弁有差○楊昌濬奏修復海鹽縣境坍塌石塘工程完竣報聞○譚鍾麟奏本年輪應查閱營伍之期陝省營制未經復舊暫請展緩允之○壬申諭崇實奏官軍平燬賊巢擒斬首逆請將出力員弁獎勵一摺奉省賊匪宋三好等勾結巨匪高希珍盤踞大東溝等處抗拒官軍經崇實派令兵勇分路進剿本年五月十七日輪船官兵直衝賊巢用炮轟擊該匪傾巢北竄立將賊巢並房屋二百餘間一律平燬其沙河子踞賊亦同時合竄復經官軍節節兜剿先後斃賊八百餘名生擒二百餘名匪首高希珍業已陣斬並將宋濠和宋三好等拿獲正法辦理尙為妥速此次出力各員尙屬著有微勞自應量予獎勵總兵陳濟清著賞穿黃馬褂並賞換副將阿巴圖魯名號副將左寶貴著以總兵記名請旨簡放並賞給銜色巴圖魯名號提督王恆風著賞給一品封典並賞換業普肯巴圖魯名號遊擊張遠富著免補參將以副將儘

先補用並賞給捷勇巴圖魯名號副將馬魁著以提督記名簡放提督王載駟著賞換那爾巴圖魯名號知縣錫祺著俟補缺後以直隸州知州用賞加運同銜參將文道山著以副將儘先補用並賞加總兵銜遊擊馮友才著以參將儘先補用並賞加副將銜都司馬占隨張恩榮均著免補遊擊以參將儘先補用遊擊張占魁著以參將儘先補用並賞給勝勇巴圖魯名號副將吳得勝著以總兵補用並賞給奮勇巴圖魯名號參將李有發著以副將儘先補用並賞加總兵銜協領音德安著賞加二品銜並賞換花翎都司劉福全著免補遊擊留於直隸以參將儘先補用騎校佟氏蔭著以防禦儘先補用並賞換花翎以上各員均著先換頂戴其餘出力各員及陣亡受傷兵弁著查明奏請分別獎卹○甲戌 上詣奉先殿 壽皇殿行禮○詔免直隸各州縣同治十年以前民欠旗租○諭軍機大臣等景廉等奏會商軍務現在需糧甚緊并陳糧運情形各摺片烏魯木齊逆匪日久負隅賊黨分踞畜牧地等處南路吐魯番則有安集延盤踞大兵進剿勢必互相救援或山南路絕徑窺我後路以圖牽掣應如何分路進兵使該逆首尾不能兼顧著左宗棠金順會商機宜妥籌調度刻下古濟等處糧石業已搜買淨盡沙山等處將定西營馬隊撤回就食該處現駐各營口糧仍缺亦應設法接濟金順所部後隊未能調齊前進現經景廉等多方籌畫尙難接至新糧延至冬令長途積雪加以天山之阻則輓糧更難爲計著左宗棠督飭

承辦各員將關內糧石迅速轉運務於本年秋間運解數萬石到古城以裕軍食該處需糧情形甚爲迫切倘饋餉稍有不繼貽誤戎機或竟因飢譁潰左宗棠豈能當此重咎耶烏科兩城糧運無從籌辦巴里坤迤北大巴地方收糧亦屬無多歸化包頭採買米麩事屬可行惟運費較鉅左宗棠已派員攜銀二萬兩前往試辦并著籌款增採總之關外軍糧無論山何處採辦左宗棠實無旁貸務當悉心經理俾資飽騰毋得意存朕視署巴里坤領隊大臣慶齡現在降調沙克都林扎布能否赴任著金順查明具奏將此由六百里各諭令知之○劉長佑奏土田州岑鈺麻景翠等匪糾黨肆行劫殺經臣咨行左江鎮道及統領防軍候補道趙沃就近酌派營勇應援並委補用道梧州府知府徐延旭前往督同各營會商籌思恩府知府柳增秀分別剿撫於上年十一月十五日奏報聲明應改土歸流臣與司道及在事文武悉心商議隨時具奏欽奉 諭旨著卽督飭徐延旭等設法剿辦毋任貽害地方俟剿撫事竣再行體查情形妥籌具奏欽此欽遵在案臣維土田州在思恩府境內西界雲南土富州地處僻悍械鬪成風世襲土知州岑氏係宋代隨征有功承襲土官以守其祀自前明以來叛服無常明臣王守仁討平仍以岑氏爲土吏目後復升爲土知州賴給銅印其命盜等案歸白色回知承審乃岑氏族衆支分爭鬪仇鬪層見迭出嘉慶年間岑勳兩次爭鬪至咸豐五年土知州岑乃青病故無子爭鬪又起於是岑裕基爭鬪岑鉅岑鈺又

爭與官族糾黨構禍土目乘勢殃民獷悍性成終難不變零土知州岑森又與岑鉞結黨仇殺土民流離轉徙日不聊生當以岑森不職撤革而岑鉞等招黨未散仍復肆行劫殺自徐延旭等前往督勇剿撫岑鉞懼於兵威與其黨麻景聚潛逃檄飭東蘭州文武在鳳山一帶兜緝無蹤餘匪亦紛然逃散第土民橫被焚掠其困苦情形視遭賊最久之區爲尤甚臣論飭徐延旭宣布 朝廷德意隨時撫恤該土民等得見漢官凡事行所到秋毫無擾遂陸續接踵來營泣訴苦狀均願歸漢官管轄不願復爲岑氏土民其望切改流甚避水火自應及早定計以救民生迭據徐延旭及該管道府稟呈情形臣與藩臬兩司悉心籌商土州既迭起爭端互相仇鬪自乃青病故後又無近支合例應襲之人如立遠支一人即可無爭亦何樂岑氏失其世守但一岑立諸岑必爭土民不免仍罹於難其禍亂將相尋不已現據體察與情稟請改流自是拔木塞源之計查土田州地方內外共分十里每里分三都每都分四闕每闕之廣十里二十里不等多與白色屬奉議州緊相毗連今請改流擬於燕喇險要之地設立知縣一員作爲苗疆衝要調缺俾令整飭化導一洗從前土官科派陋習其餘各里附近白色者撥歸白色管轄將白色同知升爲苗疆直隸屬以新設之縣屬之附近奉議者撥歸奉議管轄即將奉議州州判升爲簡缺知州以資控制至岑氏一族其構禍逃亡者現飭密緝懲辦餘皆疎遠之族應如何處置俾免遷徙失所及此外添設官員建

立學校移添營汛弁兵修建城垣衙署與夫清查田畝地糧編查煙戶各事宜應檄飭徐延旭等就近悉心確查稟呈次第籌辦據藩司文格署臬司嚴樹生先將擬請改流大概情形會詳請奏前來臣查粵西慶遠府屬之東蘭州鎮安府屬之小鎮安通判思恩府屬之那馬通判均因地方多故承襲不得其人先後改土歸流今土田州爭鬪擗毀地方糜爛甚於他處而查其親支又實無堪襲之人自可援案辦理以安黎庶相應請 旨將土田州知州革去世襲其地改設苗疆知縣一缺並將百色同知奉議州州判二缺酌量升爲苗疆直隸州缺知州就近撥其地以資治理下部議○乙亥烏里雅蘇台參贊大臣多布沁扎木楚以病免以車林多爾濟爲烏里雅蘇台蒙古參贊大臣○丙子 上詣 觀德殿 穆宗毅皇帝几筵前行禮○諭本年九月十八日 穆宗毅皇帝暨 孝哲毅皇后梓宮奉移 山陵所有應行典禮並一切事宜著各該衙門及直隸總督敬謹預備○諭恭纂 穆宗毅皇帝實錄稿本著徐桐敬謹專司勛辦○丁丑諭禮部本年七月十二日 慈安端裕康慶皇太后萬壽聖節禮儀請有遊行等語朕奉 慈安端裕康慶皇太后 慈福端佑康頤皇太后懿旨是日著停止 慈寧宮寶庫停止筵宴毋庸設立儀仗樂仍設而不作皇帝於養心殿行禮王公大臣二品以上各員在慈寧門外行禮三品以下各員在午門外行禮所有內廷宮眷及公主福晉命婦均著停止行禮○諭軍機大臣等劉長佑奏廣

西現辦邊防右江鎮或在甚重請飭實任緝兵迅即赴任等語廣西右江鎮總兵周盛傳現在能否前赴本任著李鴻章體察情形據實具奏○岑毓英奏查明馬嘉理實被野人劫殺現飭拏辦並查探威妥瑪如果帶兵來滇即行設法阻止 上諭軍機大臣等岑毓英奏查明馬嘉理被戕情形暨阻止威妥瑪帶兵入滇各摺片所陳騰越屬民既先期聯絡土司齊團防堵李珍國曾經會團一次又稱並無子姪帶兵干預公事聞野人劫掠道人往探已無蹤跡所敘蠻允夷民之言及查驗失事地方情形亦屬愉快事關中外交涉不可稍涉含混致生枝節○諭軍機大臣等劉長佑奏越南國王因奉到 穆宗毅皇帝遺詔擬遣使恭進香禮又齎進表文方物慶賀登極各摺越南國備列藩封虔修職貢今該王阮福時以接奉遺詔欲遣使遠來進香並因登極呈進方物具見惻忱著該撫即行查照成案奏明辦理將此諭令知之○戊寅諭軍機大臣等臺灣官軍攻克獅頭等社後附近各社到營乞撫經唐定奎示以條約均尚輪服即著將應辦各事次第妥籌務令懷德畏威以爲一勞永逸之計臺北兇番出沒經兵勇擊退現俱安靜仍著妥爲彈壓木瓜等社就撫中路開山並卑南一帶招集屯丁建築碉堡等事著飭該員認真經理嘉義縣滋事匪首業經格斃在逃各匪責成地方文武緝獲沈葆楨已諭令來京陛見所有臺灣開山撫番事宜著王凱奏籌具奏後再行內渡將船政事宜妥爲交代即日起程北上福建內地並臺灣所屬

各縣及各番社著詳細繪圖呈覽並將各種番族形狀另行詳繪成帙一併呈進○兩江總督兼辦理通商事務大臣沈葆楨奏請解任上溫諭止之仍著來京陛見○己卯命丁日昌辦理祿魯國互換條約事宜○諭軍機大臣等華工在祿魯各處山寮受其凌虐必須妥議辦法李鴻章擬於前定查辦專條互換時再由換約大臣給與照會令將以前虐待華人各情弊嚴為禁革之處卽著照所擬辦理○庚辰諭軍機大臣等李瀚章奏請調員差委一摺江蘇候補同知陳福勳候補知縣孫文川著劉坤一於該二員中酌派一員飭令搭坐輪船迅赴湖北交李瀚章差委刑部候補主事陳蘭彬現在尙有經手事件能否前往之處著總理各國事務衙門酌度情形奏明辦理將此由四百里各諭令知之○予山西交城縣烈婦武張氏旌表○壬午諭本年九月十八日由 觀德殿 永思殿奉移 穆宗毅皇帝 孝哲毅皇后梓宮朕追維 覆轡深恩瞻仰 靈輿尤深攀戀屆期步行恭送至地安門外藉以稍申哀悃○諭本年九月十八日朕奉 慈禧端裕康慶皇太后 慈禧端佑康頤皇太后躬送 穆宗毅皇帝暨 孝哲毅皇后梓宮奉移 山陵沿途地方毋庸另備御道該衙門知道○癸未諭景瑞現放馬蘭鎮總兵仍兼管陀峪萬年吉地承修大臣差使○甲申 上詣 觀德殿 穆宗毅皇帝几筵前行禮○乙酉 上詣 觀德殿 穆宗毅皇帝几筵前 永思殿 孝哲毅皇后几筵前行禮○以隆懃著正白旗漢軍都統○吉

林副都統奕艾緣事革職○丙戌予援黔楚軍傷亡將士於苗疆施洞口建忠義總祠○景廉奏巴里坤後路糧臺存儲糧石除撥給金順文麟明春各營並滿緣兩營外尚有市斗糧八百餘石奴才前因金順所部尅期拔隊赴古前缺口食不敷供支劑飭巴里坤糧臺委員署鎮標中營游擊尹吉寶預覓車駝迅將存儲糧石運解古城以應急需等因旋據總糧臺委員呈據尹吉寶呈稱因和雪難行車駝缺乏已與商民借給糧六七百石言定明正交至古城其餘糧石委員趕於開印後親詣古城抽數交清等語轉呈前來奴才伏查軍糧顆粒爲重該委員竟敢私與商民匯兌實屬膽大妄爲且巴里坤與古城糧價迥殊難保無意圖中飽情事當於該委員因公赴古之便飭委營務處傳訊據尹吉寶稟稱卑職因緣營缺糧目親兵丁飢餓情形陸續由糧臺借放兵糧五百一十石擬俟戶糧收齊如數歸款下存糧石不多無腳輓運放給戶民糧種糧二百二十石言明在古城兌交以清款項等語與前次所呈借給商民六七百石之語不合其中顯有情弊奴才卽飭該委員兼程回坤一面劑飭鎮標道恩編切實查訊去後茲據恩編中標訊據尹吉寶供稱於糧臺存儲糧石內借給北路戶民麥稞二百石南圖戶民麥稞二百石借給金軍糧局麥稞二百三十二石三斗撥給綠營青稞一百六十石以上共糧五百一十二石三斗當訊以前撥綠營糧一百六十石何時所發據稱隨時散放並由營庫存餉內出銀一千七百兩復訊以綠營係

撥糧一百六十石何以在古城稟稱撥過糧五百餘石該委員俯首無詞惟求施恩傳訊北路團總趙瑛南圍團總張方策均稱實係由尹委員處借撥過糧二百二十石查詢金軍糧局委員則稱前後託尹委員代買糧一百二十餘石其價已如數發清並無短少質之尹吉寶亦無異詞據恩綸先將查訊大概情形中復前來據此該委員尹吉寶前後所供種種矛盾撥過糧石數目迥不相符餘糧是否存倉亦未供明諸多不實不盡而應澈底根究以重軍儲待 旨尹吉寶著先行革職歸案嚴訊○丁亥諭軍機大臣會同禮部奏擬請舉行 升祔典禮一摺本年九月十八日 穆宗毅皇帝 孝哲毅皇后梓宮奉移 山陵距永遠泰安之期為時尚遠若俟永安 山陵後始行 升祔歲月稽遲殊無以妥 先靈而昭誠敬朕心實有未安 穆宗毅皇帝 孝哲毅皇后神牌卽於 奉先殿神庫內擇吉恭製先行 升祔 奉先殿俟將來 山陵永遠泰安禮成後再行 升祔 太廟該衙門其詳查典禮敬謹遵行○戊子諭丁寶楨奏知縣徵收漕糧浮收勒折請革職拿問一摺山東招遠縣知縣文榮上年在署博平縣任內經徵同治十三年漕米預將糧串撕給糧差令其先行墊完每斗浮收制錢至七百文之多實屬贖玩已極文榮著卽革職拿問交丁寶楨提同經書人等嚴訊確情按律懲辦以儆官邪○己丑諭本年九月十八日 穆宗毅皇帝 孝哲毅皇后梓宮奉移 山陵前經降旨朕奉 慈安端裕康慶皇太后 慈福端

佑康頤皇太后躬送茲據禮親王世鐸等奏合詞籲懇請暫停恭送一摺朕受 穆宗毅皇帝付託之重
悲痛時繁瞻仰 靈輿尤深戀戀即親行引繡亦豈足盡哀慕之忱今王大臣合詞籲懇深恐朕體過勞
請准暫停躬送茲欽奉 兩宮皇太后慈旨覽奏深增悽愴梓宮暫安隆福寺行宮日月有時山陵卜吉
追維往昔悲感曷勝若奉移之際不獲親臨一視中懷倍深悽怛皇帝尙在沖齡侍奉偕行沿途藉口保
護王大臣毋庸請欽此朕仰承 慈訓曷敢有違因思 兩宮皇太后撫恤朕躬方且無微不至而當
此 山陵大事朕若自圖安逸不克親行問心其何以安所有躬送 穆宗毅皇帝 孝哲毅皇后梓宮
奉移 山陵仍著各該衙門欽遵前旨敬謹辦理○庚寅以杜瑞聯爲四川按察司○諭李鴻章屬催承
德府暨各州縣欠交同治十三年熱河兵米○辛卯 上詣 觀德殿 穆宗毅皇帝几筵前行禮○李
瀚章翁同龢奏整飭歸州灘務明定章程請 勅部立案以垂久遠報聞○壬辰諭軍機大臣等黑龍江
營伍空虛亟宜簡練軍旅以壯聲勢著黑龍江營伍於在伍兵丁實練六千名西丹兵丁添練四千名分
旗調考各屯騎射鎗箭等務當督率各官兵實力操防不得稍涉鬆懈至招集流民最難駕馭能否
募練五千名備我驅策不致滋生事端並著黑龍江等體察情形奏明辦理黑龍江練兵工食馬乾每年應
撥銀八萬四千兩著丁寶楨劉齊銜各於該省地丁項下每年各撥銀四萬二千兩解交黑龍江應用○

頤勤和布杜嚙爾奏烏里雅蘇台城垣請暫用草坯補砌報聞○癸巳 上詣 大高殿 瞻皇殿行禮
畢詣 觀德殿 穆宗毅皇帝几筵前行禮